

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

सप्तमकाण्डे प्रथमः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

7 कृष्ण यजुर्वेदीय तैत्तिरीय संहितायां पद पाठे
सप्तमं काण्डं 3

7.1 सप्तमकाण्डे प्रथमः प्रश्नः—

अश्वमेधगतमन्त्राणामभिधानं 3

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय संहितायां पद पाठे सप्तमं

काण्डं

7.1 सप्तमकाण्डे प्रथमः प्रश्नः– अश्वमेधगतमन्त्राणामभिधानं

TS 7.1.1.1

प्र॒जन॑नं॒ ज्योति॑र॒ग्नि-दे॒वता॑नां॒ ज्योति॑र्वि॒राट् छ॒न्दसां॒ ज्योति॑र्वि॒राड्
वाचो॑ऽग्नौ॒ सं तिष्ठ॑ते वि॒राज॑म॒भि संप॑द्यते तस्मात् तज्ज्योति॑रुच्यते द्वौ
स्तोमौ॑ प्रा॒तस्स॑वनं॒ वह॑तो॒ यथा॑ प्रा॒णश्चा॑ऽपानश्च॒ द्वौ मा॑द्ध्यंदि॒नञ्
स॒वनं॒ यथा॑ चक्षुश्च॒ श्रोत्रं॑ च॒ द्वौ तृ॑तीयस॒वनं॒ यथा॑ वाक् च॒ प्रति॑ष्ठा
च॒ पुरु॑षसं॒मितो॒ वा ए॒ष य॒ज्ञोऽस्थू॑रि – [] 1

TS 7.1.1.1 - Padam

प्र॒जन॑नमि॒ति प्र-ज॑ननम् । ज्योतिः॑ । अ॒ग्निः । दे॒वता॑नाम् । ज्योतिः॑ ।
वि॒राडि॑ति वि – राट् । छ॒न्दसा॑म् । ज्योतिः॑ । वि॒राडि॑ति वि – राट् ।

वा॒चः । अ॒ग्नौ । स॒मि॒ति॑ । ति॒ष्ठ॒ते॑ । वि॒रा॒ज॒मि॒ति॑ वि – रा॒ज॒म् ।
 अ॒भि । स॒मि॒ति॑ । प॒द्य॒ते॑ । तस्मा॑त् । तत् । ज्यो॒तिः॑ । उ॒च्य॒ते॑ । द्वौ ।
 स्तोमौ॑ । प्रा॒त॒स्स॒व॒न॒मि॒ति॑ प्रा॒तः – स॒व॒न॒म् । व॒ह॒तः॑ । यथा॑ ।
 प्रा॒ण इति॑ प्र – अ॒नः । च । अ॒पा॒न इत्य॑प – अ॒नः । च । द्वौ ।
 मा॒द्ध्य॒न्दि॒न॒म् । स॒व॒न॒म् । यथा॑ । चक्षुः॑ । च । श्रो॒त्र॒म् । च । द्वौ ।
 तृ॒ती॒य॒स॒व॒न॒मि॒ति॑ तृ॒ती॒य – स॒व॒न॒म् । यथा॑ । वाक् । च ।
 प्र॒ति॒ष्ठेति॑ प्र॒ति – स्था । च । पु॒रु॒ष॒स॒म्मि॒त इति॑ पु॒रु॒ष – स॒म्मि॒तः॑ ।
 वै । ए॒षः । य॒ज्ञः । अ॒स्थू॒रिः॑ । 1 (50)

TS 7.1.1.2

र्यं॑ का॒मं का॒म॒य॒ते॑ तमे॒तेना॒भ्य॒श्नु॒ते॑ सर्व॑ ह्य॒स्थु॒रि॒णाऽभ्य॒श्नु॒ते॑
 ऽग्नि॑ष्टोमे॒न वै प्र॒जाप॑तिः प्र॒जा अ॑सृजत ता अ॒ग्नि॑ष्टोमे॒नैव
 पर्य॑गृह्णात् तासां॑ परि॑गृही॒ताना॑-मश्व॒तरो॑ऽत्यप्रव॒त
 तस्या॑नुहा॒यरे॒त आ॑ऽदत्त तद्-ग॒र्द॒भे न्य॑मा॒र्त् तस्मा॑द्-ग॒र्द॒भो द्वि॑रे॒ता
 अथो॑ आहु॒र्वड॑बायां न्य॑मा॒र्दिति॑ तस्मा॑द्-वड॑बा द्वि॑रे॒ता अथो॑
 आहु॑रोष॒धीषु॑ – [] 2

TS 7.1.1.2 - Padam

यम् । कामम् । कामयते । तम् । एतेन । अभीति । अश्नुते ।
सर्वम् । हि । अस्थूरिणा । अभ्यश्नुत इत्यभि – अश्नुते ।
अग्निष्टोमेनेत्यग्नि – स्तोमेन । वै । प्रजापतिरिति प्रजा – पतिः ।
प्रजा इति प्र-जाः । असृजत । ताः । अग्निष्टोमेनेत्यग्नि-स्तोमेन ।
एव । परीति । अगृह्णात् । तासाम् । परिगृहीतानामिति
परि – गृहीतानाम् । अश्वतरः । अतीति । अप्रवत । तस्य ।
अनुहायेत्यनु – हाय । रेतः । एति । अदत्त । तत् । गर्दभे । नीति ।
अमार्ट् । तस्मात् । गर्दभः । द्विरेता इति द्वि – रेतः । अथो इति ।
आहुः । वडबायाम् । नीति । अमार्ट् । इति । तस्मात् । वडबा ।
द्विरेता इति द्वि – रेतः । अथो इति । आहुः । ओषधीषु । 2 (50)

TS 7.1.1.3

न्यमार्डिति तस्मादोषधयो ऽनभ्यक्ता रेभन्त्यथो आहुः प्रजासु न्यमार्डिति
तस्माद्-यमौ जायेते तस्मादश्वतरो न प्र जायत आत्तरेता हि तस्माद्
बर्हिष्यनवक्लृप्तः सर्ववेदसे वा सहस्रे वाऽव क्लृप्तोऽति ह्यप्रवत य

ए॒वं वि॒द्वान॑ग्नि॒ष्टोमे॒न यज॑ते प्रा॒जाताः प्र॒जा ज॒नय॑ति परि प्रजा॑ता
गृ॒ह्णाति॑ तस्मा॑दाहु॒र्ज्येष्ठ॑यज्ञ इति – [] 3

TS 7.1.1.3 - Padam

नीति॑ । अ॒मार्त् । इति॑ । तस्मा॑त् । ओष॑धयः ।
अन॑भ्यक्ता इत्य॑नभि – अ॒क्ताः । रेभ॑न्ति । अथो॑ इति॑ । आ॒हुः ।
प्र॒जास्वि॑ति प्र – जा॒सु । नीति॑ । अ॒मार्त् । इति॑ । तस्मा॑त् । य॒मौ ।
जा॒येते॑ इति॑ । तस्मा॑त् । अ॒श्वतरः॑ । न । प्रेति॑ । जा॒यते॑ ।
आ॒त्तरे॑ता इत्या॑त्त – रे॒ताः । हि । तस्मा॑त् । ब॒र्हिषि॑ । अन॑वक्लृप्त
इत्य॑नव – क्लृ॒प्तः । सर्व॑वेदस इति॑ सर्व॑-वेद॒से । वा । सह॑स्रै ।
वा । अव॑क्लृप्त इत्य॑व-क्लृ॒प्तः । अतीति॑ । हि । अप्र॑वत । यः ।
ए॒वम् । वि॒द्वान् । अ॒ग्नि॒ष्टोमे॒नेत्य॑ग्नि- स्तोमे॑न । यज॑ते । प्रेति॑ ।
अजा॑ताः । प्र॒जा इति॑ प्र-जाः । ज॒नय॑ति । परीति॑ ।
प्रजा॑ता इति॑ प्र – जा॒ताः । गृ॒ह्णाति॑ । तस्मा॑त् । आ॒हुः ।
ज्येष्ठ॑यज्ञ इति॑ ज्येष्ठ – य॒ज्ञः । इति॑ । 3 (50)

TS 7.1.1.4

प्र॒जाप॑ति॒र्वाव॑ ज्येष्ठः स ह्ये॒तेना॑ग्रेऽय॑जत प्र॒जाप॑ति॒रकाम॑यत
प्र जा॒येये॑ति स मु॒खत॑स्त्रि॒वृतं॑ निर॒मिमी॑त तम॒ग्निर्दे॒वता॑ ऽन्व॒सृज्य॑त
गाय॒त्री छन्दो॑ रथ॒न्तर॑ साम॒ ब्राह्म॑णो म॒नुष्या॑णाम॒जः प॒शूनां॑ तस्मात्
ते मु॒ख्या मु॒खतो॑ ह्य॒सृज्य॑न्तो॒रसो॑ बा॒हुभ्यां॑ पञ्च॒दशं॑ निर॒मिमी॑त
तमिन्द्रो॑ दे॒वता॑ऽन्व॒सृज्य॑त त्रि॒ष्टुप् छन्दो॑ बृ॒हथ् – [] 4

TS 7.1.1.4 - Padam

प्र॒जाप॑ति॒रिति॑ प्र॒जा – प॒तिः । वाव । ज्येष्ठः । सः । हि । ए॒तेन॑ ।
अ॒ग्रे । अ॒यज॑त । प्र॒जाप॑ति॒रिति॑ प्र॒जा – प॒तिः । अ॒काम॑यत । प्रेति॑ ।
जा॒येय॑ । इति॑ । सः । मु॒खतः॑ । त्रि॒वृत॑मिति॑ त्रि – वृ॒तम् । निर॑ति ।
अ॒मिमी॑त । तम् । अ॒ग्निः । दे॒वता॑ । अ॒न्विति॑ । अ॒सृज्य॑त । गा॒यत्री॑ ।
छन्दः॑ । रथ॒न्तर॑मिति॑ रथं – त॒रम् । साम॑ । ब्रा॒ह्मणः॑ । म॒नुष्या॑णाम् ।
अ॒जः । प॒शूना॑म् । तस्मात् । ते । मु॒ख्याः । मु॒खतः॑ । हि ।
अ॒सृज्य॑न्त । उ॒रसः॑ । बा॒हुभ्या॑मिति॑ बा॒हु – भ्या॑म् ।

पञ्चदशमिति॑ पञ्च – दशम्॑ । निरिति॑ । अमिमीत॑ । तम् । इन्द्रः॑ ।
देवता॑ । अन्विति॑ । असृज्यत॑ । त्रिष्टुप्॑ । छन्दः॑ । बृहत्॑ । 4 (50)

TS 7.1.1.5

साम॑ राजन्यो॑ मनुष्याणाम॑विः पशूनां॑ तस्मात् ते वीर्या॑वन्तो
वीर्या॑द्ध्यसृज्यन्त॑ मद्ध्यतः॑ सप्तदशं॑ निरमिमीत॑ तं विश्वे॑ देवा देवता॑
अन्वसृज्यन्त॑ जगती॑ छन्दो॑ वै रूपं॑ साम॑ वैश्यो॑ मनुष्याणां॑ गावः॑
पशूनां॑ तस्मात् त आद्या॑ अन्नधाना॑द्ध्य सृज्यन्त॑ तस्माद्-
भूया॑ऽसोऽन्येभ्यो॑ भूयिष्ठा॑ हि देवता॑ अन्वसृज्यन्त॑ पत्त॑ एकविं॑
शं॑ निरमिमीत॑ तमनुष्टुप्॑ छन्दो॑ – [] 5

TS 7.1.1.5 - Padam

साम॑ । राजन्यः॑ । मनुष्याणाम्॑ । अविः॑ । पशूनाम्॑ । तस्मात्॑ । ते ।
वीर्या॑वन्त इति॑ वीर्यं॑ – वन्तः॑ । वीर्या॑त् । हि । असृज्यन्त॑ ।
मद्ध्यतः॑ । सप्तदशमिति॑ सप्त – दशम्॑ । निरिति॑ । अमिमीत॑ ।
तम् । विश्वे॑ । देवाः॑ । देवताः॑ । अन्विति॑ । असृज्यन्त॑ । जगती॑ ।
छन्दः॑ । वैरूपम्॑ । साम॑ । वैश्यः॑ । मनुष्याणाम्॑ । गावः॑ । पशूनाम्॑ ।

तस्मात् । ते । आद्याः । अन्नधानादित्यन्न – धानात् । हि ।
असृज्यन्त । तस्मात् । भूयाँसः । अन्येभ्यः । भूयिष्ठाः । हि ।
देवताः । अन्विति । असृज्यन्त । पत्तः ।
एकविंशमित्येक – विंशम् । निरिति ।
अमिमीत । तम् । अनुष्टुबित्यनु – स्तुप् । छन्दः । 5 (50)

TS 7.1.1.6

ऽन्वसृज्यत वैराजँ साम शूद्रो मनुष्याणामश्वः पशूनां तस्मात् तौ
भूतसं क्रामिणावश्वश्च शूद्रश्च तस्माच्छूद्रो यज्ञेऽनवक्लृप्तो न हि
देवता अन्वसृज्यत तस्मात् पादावुप जीवतः पत्तो ह्यसृज्येतां प्राणा
वै त्रिवृदर्द्धमासाः पञ्चदशः प्रजापतिः सप्तदशस्त्रय इमे लोका
असावादित्य एकविंश एतस्मिन् वा एते श्रिता एतस्मिन् प्रतिष्ठिता
() य एवं वैदैतस्मिन्नेव श्रयत एतस्मिन् प्रति तिष्ठति ॥ 6

TS 7.1.1.6 - Padam

अन्विति । असृज्यत । वैराजम् । साम । शूद्रः । मनुष्याणाम् ।
अश्वः । पशूनाम् । तस्मात् । तौ ।

भू॒त॒सङ्क्रा॑मि॒णावि॑ति॒ भू॒त – सङ्क्रा॑मि॒णौ॑ । अ॒श्वः॑ । च॒ । शू॒द्रः॑ ।
च॒ । तस्मा॑त् । शू॒द्रः॑ । य॒ज्ञे॑ । अ॒न॒व॒क्लृ॑प्त॒ इत्य॑न॒व – क्लृ॑प्तः । न ।
हि॒ । दे॒वताः॑ । अ॒न्वि॑ति॒ । अ॒सृ॑ज्यत । तस्मा॑त् । पा॒दौ॑ । उ॒पे॑ति॒ ।
जी॒वतः॑ । प॒त्तः॑ । हि॒ । अ॒सृ॑ज्येता॒म् । प्रा॒णा इति॑ प्र – अ॒नाः॑ । वै ।
त्रि॒वृ॑दि॒ति त्रि॑ – वृ॒त् । अ॒र्ध॒मा॒सा इत्य॑र्ध – मा॒साः । पञ्च॑द॒श
इति॑ पञ्च – द॒शः । प्र॒जाप॑ति॒रिति॑ प्र॒जा – प॒तिः । स॒प्तद॑श इति॑
स॒प्त – द॒शः । त्रयः॑ । इ॒मे । लो॒काः । अ॒सौ । आ॒दि॒त्यः ।
ए॒क॒वि॒ंश इत्ये॑क – वि॒ंशः । ए॒तस्मि॑न् । वै । ए॒ते । श्रि॒ताः ।
ए॒तस्मि॑न् । प्र॒ति॒ष्ठा इति॑ प्र॒ति – स्था॒ताः () । यः॑ । ए॒वम् । वे॒द ।
ए॒तस्मि॑न् । ए॒व । श्र॒य॒ते । ए॒तस्मि॑न् । प्र॒ती॒ति । ति॒ष्ठ॒ति ॥ 6 (59)

(अ॒स्थू॒रि – रोष॑धीषु – ज्येष्ठ॑य॒ज्ञ इति॑ – बृ॒ह – द॒नुष्टु॑प् छन्दः –
प्र॒ति॒ष्ठा – न॒व च) (A1)

TS 7.1.2.1

प्रा॒त॒स्स॒वने॑ वै गा॒य॒त्रेण॑ छ॒न्दसा॑ त्रि॒वृ॑ते स्तो॒माय॑ ज्योति॒र्दध॑देति त्रि॒वृ॑ता॑
ब्र॒ह्म॒व॒र्च॒सेन॑ पञ्च॑द॒शाय॑ ज्योति॒र्दध॑देति पञ्च॑द॒शेनौ॑जसा वी॒र्ये॑ण

सप्तदशाय॑ ज्योति॑र्दध॑देति सप्तद॒शेन॑ प्राजाप॒त्येन॑ प्र॒जन॑नेनैकवि॒ंशाय॑
ज्योति॑र्दध॑देति स्तोम॑ ए॒व तथ् स्तोमा॑य ज्योति॑र्दध॑देत्यथो स्तोम॑ ए॒व
स्तोम॑मभि प्र॒णय॑ति याव॑न्तो वै स्तोमास्ताव॑न्तः कामास्ताव॑न्तो लो॒का
() –स्ताव॑न्ति ज्योती॑ष्येताव॑त ए॒व स्तोमा॑नेताव॑तः कामा॑नेताव॑तो
लो॒काने॑ताव॑न्ति ज्योती॑ष्यव॑ रुन्धे ॥ 7

TS 7.1.2.1 - Padam

प्रा॒तस्स॒वन॑ इति प्रा॒तः – स॒वने॑ । वै । गा॒य॒त्रेण॑ । छ॒न्द॒सा । त्रि॒वृ॒त
इति॑ त्रि – वृ॒ते । स्तोमा॑य । ज्योतिः॑ । दध॑त् । ए॒ति । त्रि॒वृ॒तेति॑
त्रि – वृ॒ता । ब्र॒ह्मव॑र्च॒सेने॑ति ब्र॒ह्म – वर्च॑सेन । पञ्च॑द॒शाये॑ति
पञ्च – द॒शाय॑ । ज्योतिः॑ । दध॑त् । ए॒ति । पञ्च॑द॒शेने॑ति
पञ्च – द॒शेन॑ । ओज॑सा । वी॒र्ये॑ण । सप्त॑द॒शाये॑ति सप्त – द॒शाय॑ ।
ज्योतिः॑ । दध॑त् । ए॒ति । सप्त॑द॒शेने॑ति सप्त – द॒शेन॑ ।
प्रा॒जाप॒त्येने॑ति प्रा॒जा – प॒त्येन॑ । प्र॒जन॑नेनेति प्र – जन॑नेन ।
ए॒कवि॒ंशाय॑त्ये॒क – वि॒ंशाय॑ । ज्योतिः॑ । दध॑त् । ए॒ति । स्तोमः॑ ।
ए॒व । तत् । स्तोमा॑य । ज्योतिः॑ । दध॑त् । ए॒ति । अथो॑ इति ।

स्तो॑मे॑ । ए॒व । स्तो॑मम् । अ॒भि । प्रेति॑ । न॒यति॑ । या॒वन्तः॑ । वै ।
स्तो॑माः । ता॒वन्तः॑ । का॒माः । ता॒वन्तः॑ । लो॒काः () । ता॒वन्ति॑ ।
ज्योती॑षि । ए॒ता॒वतः॑ । ए॒व । स्तो॑मान् । ए॒ता॒वतः॑ । का॒मान् ।
ए॒ता॒वतः॑ । लो॒कान् । ए॒ता॒वन्ति॑ । ज्योती॑षि । अ॒वेति॑ ।

रु॒न्धे ॥ 7 (63) (ता॒वन्तो॑ लो॒का – स्त्रयो॑दश च) (A2)

TS 7.1.3.1

ब्र॒ह्मवा॑दि॒नो वद॑न्ति स त्वै य॑जेत योऽग्नि॑ष्टोमे॒न यज॑मानोऽथ
सर्व॑स्तोमे॒न यजे॑तेति॒ यस्य॑ त्रि॒वृ॒तम॑न्तर्यन्ति प्रा॒णाऽ-स्त॑स्यान्तर्यन्ति
प्रा॒णेषु॑ मेऽप्य॑सदिति॒ खलु॑ वै य॒ज्ञेन॑ यज॑मानो यज॑ते यस्य
पञ्च॑दशमन्तर्यन्ति॒ वीर्यं॑ तस्यान्तर्यन्ति॒ वीर्यं॑ मेऽप्य॑सदिति॒ खलु॑ वै
य॒ज्ञेन॑ यज॑मानो यज॑ते यस्य॑ सप्त॑दश-मन्तर्यन्ति – [] 8

TS 7.1.3.1 - Padam

ब्र॒ह्मवा॑दि॒न इति॑ ब्र॒ह्म – वा॑दि॒नः । वद॑न्ति । सः । तु । वै । य॒जेत॑ ।
यः । अ॒ग्नि॑ष्टोमे॒नेत्य॑ग्नि – स्तो॑मे॒न । यज॑मानः । अथ॑ ।

सर्व॑स्तोमे॒नेति॑ सर्व॑ – स्तोमे॒न । यजे॑त । इति॑ । यस्य॑ । त्रिवृ॑तमिति॑
 त्रि – वृ॒तम् । अ॒न्तर्य॑न्तीत्यन्तः – यन्ति॑ । प्रा॒णानि॑ति प्र – अ॒नान् ।
 तस्य॑ । अ॒न्तः । यन्ति॑ । प्रा॒णेष्वि॑ति प्र – अ॒नेषु॑ । मे॒ । अपी॑ति ।
 अ॒सत् । इति॑ । खलु॑ । वै । य॒ज्ञेन॑ । यज॑मानः । यज॑ते । यस्य॑ ।
 पञ्च॑दशमिति॑ पञ्च – द॒शम् । अ॒न्तर्य॑न्तीत्यन्तः – यन्ति॑ । वी॒र्य॑म् ।
 तस्य॑ । अ॒न्तः । यन्ति॑ । वी॒र्ये॑ । मे॒ । अपी॑ति । अ॒सत् । इति॑ ।
 खलु॑ । वै । य॒ज्ञेन॑ । यज॑मानः । यज॑ते । यस्य॑ । स॒प्तद॑शमिति॑
 सप्त – द॒शम् । अ॒न्तर्य॑न्तीत्यन्तः – यन्ति॑ । 8 (50)

TS 7.1.3.2

प्र॒जां तस्या॑न्तर्य॑न्ति प्र॒जायां॑ मेऽप्य॑सदिति॑ खलु॑ वै य॒ज्ञेन॑ यज॑मानो
 यज॑ते यस्यै॑कवि॒ंशम॑न्तर्य॑न्ति प्र॒तिष्ठां॑ तस्या॑न्तर्य॑न्ति प्र॒तिष्ठायां॑
 मेऽप्य॑सदिति॑ खलु॑ वै य॒ज्ञेन॑ यज॑मानो यज॑ते यस्य॑
 त्रि॒णव॑मन्तर्य॑न्त्य॒तूँश्च॑ तस्य॑ नक्ष॒त्रियां॑ च वि॒राज॑मन्तर्य॑न्त्य॒तुषु॑
 मेऽप्य॑सन्नक्ष॒त्रियायां॑ च वि॒राजी॑ति – [] 9

TS 7.1.3.2 - Padam

प्र॒जामि॑ति प्र – जा॒म् । तस्य॑ । अ॒न्तः । य॒न्ति । प्र॒जाया॑मि॒ति
प्र – जा॒याम् । मे॑ । अ॒पीति॑ । अ॒सत् । इति॑ । ख॒लु । वै । य॒ज्ञेन॑ ।
यज॑मानः । यज॑ते । यस्य॑ । ए॒कवि॑ंशमि॒त्येक॑ – वि॒ंशम् ।
अ॒न्तर्य॑न्तित्यन्तः – य॒न्ति । प्र॒तिष्ठा॑मि॒ति प्र॒ति – स्था॑म् । तस्य॑ ।
अ॒न्तः । य॒न्ति । प्र॒तिष्ठा॑या॒मि॒ति प्र॒ति – स्था॑याम् । मे॑ । अ॒पीति॑ ।
अ॒सत् । इति॑ । ख॒लु । वै । य॒ज्ञेन॑ । यज॑मानः । यज॑ते । यस्य॑ ।
त्रि॒णव॑मि॒ति त्रि॑ – न॒वम् । अ॒न्तर्य॑न्तीत्यन्तः – य॒न्ति । ऋ॒तून् । च॒ ।
तस्य॑ । न॒क्षत्रि॑याम् । च॒ । वि॒राज॑मि॒ति वि॒-राज॑म् । अ॒न्तः । य॒न्ति ।
ऋ॒तुषु॑ । मे॑ । अ॒पीति॑ । अ॒सत् । न॒क्षत्रि॑यायाम् । च॒ ।
वि॒राजी॑ति वि – रा॒जि । इति॑ । 9 (50)

TS 7.1.3.3

ख॒लु वै य॒ज्ञेन॑ यज॑मानो यज॑ते यस्य॑ त्रयस्त्रि॒ंशम॑न्तर्यन्ति
दे॒वता॑स्तस्यान्तर्यन्ति दे॒वता॑सु मेऽप्य॑सदिति ख॒लु वै य॒ज्ञेन॑ यज॑मानो

यज॑ते यो॒ वै स्तो॑मा॒नाम॒वमं॑ प॒रम॑तां गच्छ॑न्तं वे॒द प॒रम॑तामे॒व गच्छ॑ति
त्रि॒वृ॒द्वै स्तो॑मा॒नाम॒वम॑स्त्रि॒वृत् प॒रमो॑ य ए॒वं वे॒द प॒रम॑तामे॒व
गच्छ॑ति ॥ 10

TS 7.1.3.3 - Padam

ख॒लु । वै । य॒ज्ञेन॑ । यज॑मानः । यज॑ते । यस्य॑ । त्रय॑स्त्रि॒ंश॒मिति॑
त्रयः॑ – त्रि॒ंश॒म् । अ॒न्तर्य॑न्तित्यन्तः – यन्ति॑ । दे॒वताः॑ । तस्य॑ ।
अ॒न्तः । यन्ति॑ । दे॒वता॑सु । मे । अपी॑ति । अ॒सत् । इति॑ । ख॒लु ।
वै । य॒ज्ञेन॑ । यज॑मानः । यज॑ते । यः । वै । स्तो॑मा॒नाम् । अ॒वम॑म् ।
प॒रम॑ताम् । गच्छ॑न्तम् । वे॒द । प॒रम॑ताम् । ए॒व । गच्छ॑ति । त्रि॒वृ॒दिति॑
त्रि – वृ॒त् । वै । स्तो॑मा॒नाम् । अ॒वमः॑ । त्रि॒वृ॒दिति॑ त्रि – वृ॒त् ।
प॒रमः॑ । यः । ए॒वम् । वे॒द । प॒रम॑ताम् । ए॒व । गच्छ॑ति ॥ 10 (44)

(स॒प्तद॑शम॒न्तर्य॑न्ति – वि॒राजी॑ति – च॒तुश्च॑त्वारि॒ंश॒च्च) (A3)

TS 7.1.4.1

अ॒ङ्गिर॑सो वै स॒त्रमा॑सत ते सु॒वर्गं॑ लो॒कमा॑यन् तेषां॑ ह॒विष्मा॑ञ्च
ह॒विष्कृ॑च्याऽही॒येतां॑ ताव॒काम॑येताञ् सु॒वर्गं॑ लो॒कमि॑यावेति तावे॒तं

द्विरा॒त्रम॑प॒श्यतां॑ तमा॒ऽहर॑तां तेना॒यजे॑तां ततो॒ वै तौ सु॒वर्गं॑ लो॒कमै॑तां
य॒ एवं॑ वि॒द्वान् द्विरा॒त्रेण॑ यज॑ते सु॒वर्गमे॒व लो॒कमे॑ति तावै॒तां
पूर्वे॑णा॒ह्वा अ॒गच्छ॑तामु॒त्तरे॑णा – [] 11

TS 7.1.4.1 - Padam

अ॒ङ्गिर॑सः । वै । स॒त्रम् । आ॒स॒त । ते । सु॒वर्ग॑मि॒ति सु॒वः – गम् ।
लो॒कम् । आ॒यन् । ते॒षाम् । ह॒विष्मा॑न् । च । ह॒विष्कृ॑दि॒ति
ह॒विः – कृ॑त् । च । अ॒ही॒येता॑म् । तौ । अ॒का॒मये॑ताम् । सु॒वर्ग॑मि॒ति
सु॒वः – गम् । लो॒कम् । इ॒याव॑ । इति॑ । तौ । ए॒तम् । द्वि॒रात्र॑मि॒ति
द्वि – रा॒त्रम् । अ॒प॒श्यता॑म् । तम् । ए॒ति । अ॒हर॑ताम् । तेन॑ ।
अ॒यजे॑ताम् । ततः॑ । वै । तौ । सु॒वर्ग॑मि॒ति सु॒वः – गम् । लो॒कम् ।
ऐ॒ताम् । यः । ए॒वम् । वि॒द्वान् । द्वि॒रात्रे॑णेति॑ द्वि – रा॒त्रेण॑ । यज॑ते ।
सु॒वर्ग॑मि॒ति सु॒वः – गम् । ए॒व । लो॒कम् । ए॒ति । तौ । ऐ॒ताम् ।
पूर्वे॑ण । अ॒ह्वा । अ॒गच्छ॑ताम् । उ॒त्तरे॑णेत्युत् – त॒रेण॑ । 11 (50)

TS 7.1.4.2

–भि॒प्लवः॑ पू॒र्वम॑ह॒र्भव॑ति गतिरु॒त्तरं॑ ज्योति॑ष्ठोमोऽग्नि॑ष्ठोमः पू॒र्वम॑ह॒र्भव॑ति
तेज॑स्तेना॒व रु॒न्धे सर्व॑स्तोमोऽति॒रात्र॑ उत्त॒रꣳ सर्व॑स्याऽऽ*प॒त्यै
सर्व॑स्याऽव॒रुद्ध्यै॑ गा॒यत्रं॑ पू॒र्वेऽह॑न्त्साम॒ भव॑ति तेजो॒ वै गा॒यत्री॑ गा॒यत्री॑
ब्र॒ह्मव॑र्चसं तेज॒ एव॑ ब्र॒ह्मव॑र्चसमा॒त्मन् ध॑त्ते त्रै॒ष्टुभ॑मुत्त॒र ओजो॒ वै वी॒र्यं॑
त्रि॒ष्टुगो॑ज॒ एव॑ वी॒र्यमा॒त्मन् ध॑त्ते रथं॒तरं॑ पू॒र्वे – [] 12

TS 7.1.4.2 - Padam

अ॒भि॒प्लव॑ इत्य॒भि – प्ल॒वः । पू॒र्वम् । अ॒हः । भ॒वति॑ । गतिः॑ ।
उत्त॒रमि॑त्युत् – त॒रम् । ज्योति॑ष्ठोम॒ इति॑ ज्योति॑ – स्तोमः॑ ।
अ॒ग्नि॒ष्ठोम॑ इत्य॒ग्नि–स्तो॑मः । पू॒र्वम् । अ॒हः । भ॒वति॑ । तेजः॑ । तेन॑ ।
अवे॑ति । रु॒न्धे । सर्व॑स्तोम॒ इति॑ सर्व॑–स्तोमः॑ । अ॒ति॒रात्र॑
इत्य॑ति–रा॒त्रः । उत्त॒रमि॑त्युत् – त॒रम् । सर्व॑स्य । आ॒प॒त्यै । सर्व॑स्य ।
अ॒व॒रुद्ध्यै॑ इत्य॒व – रु॒द्ध्यै॑ । गा॒यत्रम् । पू॒र्वे । अ॒हन् । साम॑ ।
भ॒वति॑ । तेजः॑ । वै । गा॒यत्री॑ । गा॒यत्री॑ । ब्र॒ह्मव॑र्चसमि॒ति
ब्र॒ह्म – व॒र्चसम् । तेजः॑ । ए॒व । ब्र॒ह्मव॑र्चसमि॒ति ब्र॒ह्म – व॒र्चसम् ।

आ॒त्मन् । ध॒त्ते । त्रै॒ष्टु॒भम् । उत्त॑र इत्युत् – त॒रे । ओजः॑ । वै ।
वी॒र्य॑म् । त्रि॒ष्टुक् । ओजः॑ । ए॒व । वी॒र्य॑म् । आ॒त्मन् । ध॒त्ते ।
रथ॑न्तरमि॒ति रथं॑ – त॒रम् । पूर्वे॑ । 12 (50)

TS 7.1.4.3

ऽह॑न्त् साम॑ भव॒तीयं॑ वै रथ॑न्तरमस्यामे॒व प्र॒ति ति॒ष्ठति॑ बृ॒हदु॑त्तरेऽसौ॑ वै
बृ॒हद॑मु॒ष्यामे॒व प्र॒ति ति॒ष्ठति॑ तदा॒हुः क्व॑ जग॒ती चा॒नु॒ष्टुप् चेति॑
वै॒खान॑सं पूर्वे॑ऽह॑न्त् साम॑ भव॒ति तेन॑ जग॒त्यै नैति॑ षोड॒श्यु॑त्तरे
तेना॑नु॒ष्टुभो॑ऽथा ऽऽ*हु॒र्यथ्॑ स॒माने॑ऽर्ध॒मासे॑ स्याता॑-मन्य॒तरस्या॑हो
वी॒र्य॑मनु॑ () प॒द्येते॑त्य-मा॒वास्या॑यां पूर्॒वम॑ह-र्भव॒त्युत्त॑रस्मि-न्नुत्त॑रं
ना॒नैवा॑ ऽर्ध॒मास॑योर्भव॒तो नाना॑वी॒र्ये भव॑तो ह॒विष्म॑न्निध॒नं
पूर्॒वम॑हर्भव॒ति ह॒विष्कृ॑न्निध॒न-मु॑त्त॒रं प्र॒तिष्ठि॑त्यै ॥ 13

TS 7.1.4.3 - Padam

अ॒हन् । सा॒म । भ॒वति॑ । इ॒यम् । वै । रथ॑न्तरमि॒ति रथं॑ – त॒रम् ।
अ॒स्याम् । ए॒व । प्र॒तीति॑ । ति॒ष्ठति॑ । बृ॒हत् । उत्त॑र इत्युत् – त॒रे ।
अ॒सौ । वै । बृ॒हत् । अ॒मु॒ष्याम् । ए॒व । प्र॒तीति॑ । ति॒ष्ठति॑ । तत् ।

आ॒हुः । क्व । ज॒गती । च । अ॒नु॒ष्टु॒बि॒त्यनु॑ – स्तुप् । च । इति॑ ।
 वै॒खा॒न॒सम् । पूर्वे॑ । अ॒हन् । सा॒म । भ॒वति॑ । ते॒न । ज॒ग॒त्यै । न ।
 ए॒ति । षोड॑शि । उ॒त्तर॑ इत्युत् – तरे॑ । ते॒न ।
 अ॒नु॒ष्टु॒भ इत्यनु॑ – स्तु॒भः । अथ॑ । आ॒हुः । यत् । स॒मा॒ने ।
 अ॒र्ध॒मा॒स इत्य॑र्ध – मा॒से । स्या॒ताम् । अ॒न्य॒तर॒स्य । अ॒हः ।
 वी॒र्य॑म् । अ॒न्वि॒ति () । प॒द्ये॒त । इति॑ ।
 अ॒मा॒वा॒स्या॒या॒मि॒त्य॒मा – वा॒स्या॒याम् । पूर्वे॑म् । अ॒हः । भ॒वति॑ ।
 उ॒त्तर॑स्मिन्नित्युत् – त॒र॒स्मिन् । उ॒त्तर॑मित्युत् – त॒र॒म् । ना॒ना । ए॒व ।
 अ॒र्ध॒मा॒सयो॒रि॒त्य॑र्ध – मा॒सयोः॑ । भ॒वतः॑ । ना॒ना॒वी॒र्ये॑ इति॑
 ना॒ना – वी॒र्ये॑ । भ॒वतः॑ । ह॒वि॒ष्म॒न्नि॒ध॒न॒मि॒ति॑ ह॒वि॒ष्मत् – नि॒ध॒न॒म् ।
 पूर्वे॑म् । अ॒हः । भ॒वति॑ । ह॒वि॒ष्कृ॒न्नि॒ध॒न॒मि॒ति॑ ह॒वि॒ष्कृत् – नि॒ध॒न॒म् ।
 उ॒त्तर॑मित्युत् – त॒र॒म् । प्र॒ति॒ष्ठि॒त्या इति॑ प्र॒ति – स्थि॒त्यै ॥ 13 (71)

(उ॒त्त॒रेण॑ – र॒थ॒न्त॒रं पूर्वे॑ – ऽन्वे – क॒वि॒श्शति॑श्च) (A4)

TS 7.1.5.1

आपो वा इदमग्रे सलिलमासीत् तस्मिन् प्रजापति-र्वायुर्भूत्वा ऽचरत्
स इमामपश्यत् तां वराहो भूत्वाऽहरत् तां विश्वकर्मा भूत्वा व्यमार्त्
साऽप्रथत सा पृथिव्यभवत् तत् पृथिव्यै पृथिवित्वं तस्यामश्राम्यत्
प्रजापतिः स देवानसृजत वसून् रुद्रानादित्यान् ते देवाः
प्रजापतिमब्रुवन् प्रजायामहा इति सोऽब्रवीद् – [] 14

TS 7.1.5.1 - Padam

आपः । वै । इदम् । अग्रे । सलिलम् । आसीत् । तस्मिन् ।
प्रजापतिरिति प्रजा – पतिः । वायुः । भूत्वा । अचरत् । सः ।
इमाम् । अपश्यत् । ताम् । वराहः । भूत्वा । एति । अहरत् । ताम् ।
विश्वकर्मेति विश्व-कर्मा । भूत्वा । वीति । अमार्त् । सा । अप्रथत ।
सा । पृथिवी । अभवत् । तत् । पृथिव्यै । पृथिवित्वमिति
पृथिवि – त्वम् । तस्याम् । अश्राम्यत् । प्रजापतिरिति प्रजा-पतिः ।
सः । देवान् । असृजत । वसून् । रुद्रान् । आदित्यान् । ते । देवाः ।

प्र॒जा॒प॒ति॒मि॒ति॒ प्र॒जा – प॒ति॒म् । अ॒ब्रु॒वन् । प्रे॒ति॒ । जा॒या॒म॒है॒ । इति॑ ।

सः । अ॒ब्र॒वीत् । 14 (50)

TS 7.1.5.2

–यथा॑ऽहं॑ यु॒ष्मा॒स्तप॒सा ऽसृ॑क्ष्ये॒वं तप॑सि प्र॒जन॑न–मि॒च्छ॒ध्वमि॒ति॒
तेभ्यो॑ऽग्नि॒मा॒य॒त॒नं प्रा॑ऽय॒च्छ॒दे॒तेना॑ऽऽ*य॒त॒नेन॑ श्राम्य॒तेति॑
॥ ते॑ऽग्नि॒नाऽऽ*य॒त॒नेना॑ऽ–श्राम्यन्॒ ते स॑व॒त्स॒र ए॒कां गा॑म॒सृज॑न्त॒ तां
व॑सु॒भ्यो रु॒द्रेभ्य॑ आ॒दि॒त्येभ्यः॑ प्रा॑ऽय॒च्छ॒न्नेता॑ र॒क्ष॒ध्वमि॒ति॒ तां
व॑स॒वो रु॒द्रा आ॒दि॒त्या अ॒रक्ष॑न्त॒ सा व॑सु॒भ्यो रु॒द्रेभ्य॑ आ॒दि॒त्येभ्यः॑
प्राजा॑यत॒ त्रीणि॑ च – [] 15

TS 7.1.5.2 - Padam

यथा॑ । अ॒हम् । यु॒ष्मान् । तप॑सा । अ॒सृ॒क्षि॒ । ए॒वम् । तप॑सि ।
प्र॒जन॑नमि॒ति॒ प्र – ज॒न॒नम् । इ॒च्छ॒ध्वम् । इति॑ । तेभ्यः॑ । अ॒ग्निम् ।
आ॒य॒त॒न॒मि॒त्या – य॒त॒नम् । प्रे॒ति॒ । अ॒य॒च्छ॒त् । ए॒तेन॑ ।
आ॒य॒त॒ने॒ने॒त्या – य॒त॒नेन॑ । श्राम्य॒त॒ । इति॑ । ते । अ॒ग्नि॒ना॑ ।
आ॒य॒त॒ने॒ने॒त्या – य॒त॒नेन॑ । अ॒श्राम्य॑न् । ते ।

सँव॑थ्स॒र इति॑ सं – व॒थ्स॒रे । ए॒का॒म् । गा॒म् । अ॒सृ॒जन्त॑ । ता॒म् ।
व॒सु॒भ्य इति॑ व॒सु – भ्यः॑ । रु॒द्रे॒भ्यः॑ । आ॒दि॒त्ये॒भ्यः॑ । प्रेति॑ ।
अ॒य॒च्छन् । ए॒ता॒म् । र॒क्ष॒ध्व॒म् । इति॑ । ता॒म् । व॒स॒वः॑ । रु॒द्राः॑ ।
आ॒दि॒त्याः॑ । अ॒रक्ष॑न्त । सा । व॒सु॒भ्य इति॑ व॒सु – भ्यः॑ । रु॒द्रे॒भ्यः॑ ।
आ॒दि॒त्ये॒भ्यः॑ । प्रेति॑ । अ॒जा॒यत॑ । त्री॒णि । च । 15 (50)

TS 7.1.5.3

श॒ता॒नि त्र॑यस्त्रिं॒श॒तं चाथ॑ सै॒व स॒ह॒स्र॒त॒म्य॒भ॒वत् ते दे॒वाः
प्र॒जा॒प॒ति॒म॒ब्रु॒वन्थ् स॒ह॒स्रे॒ण नो॑ या॒ज॒येति॑ सौ॒ऽग्नि॒ष्टो॒मे॒न व॒सू॒न॒या॒ज॒यत्
त इ॒मं लो॒क॒म॒ज॒यन् तच्चा॑ददुः स उ॒क्थ्ये॑न रु॒द्रा॒न॒या॒ज॒यत्
ते॒ऽन्त॒रि॒क्ष॒म॒ज॒यन् तच्चा॑ददुः सौ॒ऽति॒रा॒त्रे॒णाऽऽ॒दि॒त्या॒न॒या॒ज॒यत् ते॒ऽमुं
लो॒क॒म॒ज॒यन् तच्चा॑ददुः – स्तद॒न्त॒रि॒क्षं – [] 16

TS 7.1.5.3 - Padam

श॒ता॒नि । त्र॑यस्त्रिं॒श॒त॒मि॒ति त्र॑यः – त्रिं॒श॒त॒म् । च । अथ॑ । सा ।
ए॒व । स॒ह॒स्र॒त॒मी॒ति स॒ह॒स्र – त॒मी । अ॒भ॒वत् । ते । दे॒वाः ।

प्र॒जा॒प॒ति॒मि॒ति॒ प्र॒जा – प॒ति॒म् । अ॒ब्रु॒वन् । स॒हस्रे॑ण । नः । या॒ज॒य ।
 इति॑ । सः । अ॒ग्नि॒ष्टो॒मे॒नेत्य॑ग्नि-स्तो॒मे॒न । व॒सून् । अ॒या॒ज॒यत् । ते ।
 इ॒मम् । लो॒कम् । अ॒ज॒यन् । तत् । च । अ॒द॒दुः । सः । उ॒क्थ्ये॑न ।
 रु॒द्रान् । अ॒या॒ज॒यत् । ते । अ॒न्तरि॑क्षम् । अ॒ज॒यन् । तत् । च ।
 अ॒द॒दुः । सः । अ॒ति॒रा॒त्रे॒णे॒त्य॒ति – रा॒त्रे॒ण । आ॒दि॒त्यान् । अ॒या॒ज॒यत् ।
 ते । अ॒मुम् । लो॒कम् । अ॒ज॒यन् । तत् । च । अ॒द॒दुः । तत् ।
 अ॒न्तरि॑क्षम् । 16 (50)

TS 7.1.5.4

व्य॑वैर्य॒त तस्मा॑द्-रु॒द्रा घा॑तु॒का अ॒नाय॑त॒ना हि तस्मा॑दाहुः शि॒थिलं॑ वै
 म॒द्ध्य॑म-म॒हस्त्रि॑रा॒त्रस्य॑ वि हि तद॒वैर्य॑तेति॒ त्रैष्टु॑भं म॒द्ध्य॑मस्याह
 आ॒ज्यं भ॑वति स॒याना॑नि सू॒क्तानि॑ श॒सति॑ षोड॒शिन॑ श॒सत्य॑हो
 धृ॒त्या अ॒शि॒थिलं॑भावाय तस्मा॑त् त्रि॒रा॒त्रस्या॑ग्नि॒ष्टोम॑ ए॒व प्र॑थ॒मम॑हः
 स्या॒दथो॒क्थ्यो ऽथा॑ऽति॒रा॒त्र ए॒षां लो॒कानां॑ वि॒धृत्यै॑ त्री॒णित्री॑णि
 श॒ता-न्य॑नू॒चीना॑ह-म॒व्यव॑च्छिन्नानि ददा - [] 17

TS 7.1.5.4 - Padam

व्यवैर्यतेति॑ वि – अवैर्यत॑ । तस्मात्॑ । रुद्राः॑ । घातु॑काः । अनाय॑तना
इत्य॑ना – यत॑नाः । हि । तस्मात्॑ । आहुः॑ । शिथि॑लम् । वै ।
मद्ध्य॑मम् । अहः॑ । त्रिरा॑त्रस्येति॑ त्रि – रात्र॑स्य । वीति॑ । हि । तत् ।
अवैर्य॑तेत्यव – ऐर्य॑त । इति॑ । त्रैष्टु॑भम् । मद्ध्य॑मस्य । अहः॑ ।
आज्य॑म् । भवति॑ । सँयाना॑निति॑ सम् – याना॑नि । सूक्ता॑नीति
सु – उक्ता॑नि । श॑ञ्सति॑ । षोड॑शिनम् । श॑ञ्सति॑ । अहः॑ । धृत्यै॑ ।
अशि॑थिलम्भावायेत्य॑शिथिलं – भावा॑य । तस्मात्॑ । त्रिरा॑त्रस्येति॑
त्रि – रात्र॑स्य । अग्नि॑ष्टोम इत्य॑ग्नि – स्तोमः॑ । एव । प्रथ॑मम् ।
अहः॑ । स्यात् । अथ॑ । उक्थ्यः॑ । अथ॑ । अति॑रात्र इत्य॑ति – रात्रः॑ ।
एषा॑म् । लोका॑नाम् । विधृ॑त्या इति॑ वि – धृत्यै॑ । त्रीणि॑त्रीणीति॑
त्रीणि॑ – त्रीणि॑ । शता॑नि । अनू॑चीनाह॑मित्य॑नूचीन – अह॑म् ।
अव्य॑वच्छिन्नानीत्य॑वि – अव॑च्छिन्नानि॑ । ददा॑ति । 17 (50)

TS 7.1.5.5

–त्येषां लो॒काना॒मनु॒ सन्त॑त्यै द॒शतं॑ न वि॒च्छि॒न्धाद्–वि॒राजं॑
ने॒द्वि॒च्छि॒न॒दानी॑त्यथ॒ या स॑ह॒स्रत॑म्यासीत् तस्यामिन्द्रश्च विष्णुश्च
व्याय॑च्छेता॒ स इन्द्रो॑ऽमन्यतानया वा इदं विष्णुः सहस्रं वक्ष्य॑त
इति॑ तस्यामकल्पेतां द्वि॒भाग॑ इन्द्रस्तृतीये विष्णुस्तद्वा एषाऽभ्यनू॑च्यत
उ॒भा जि॑ग्यथुरिति॒ तां वा॑ ए॒ताम॑च्छावाक – [] 18

TS 7.1.5.5 - Padam

ए॒षाम् । लो॒काना॑म् । अ॒न्विति॑ । सन्त॑त्या इति॒ सं – त॒त्यै । द॒शत॑म् ।
न । वी॒ति । छि॒न्धात् । वि॒राज॑मिति॒ वि – रा॒जम् । न । इत् ।
वि॒च्छि॒न॒दानी॑ति वि – छि॒न॒दानी॑ । इति॑ । अथ॑ । या । स॒ह॒स्रत॑मीति॒
सह॑स्र – त॒मी । आसीत् । तस्या॑म् । इन्द्रः । च । विष्णुः । च ।
व्याय॑च्छेतामिति॒ वि – आ॒य॒च्छेता॑म् । सः । इन्द्रः । अ॒मन्य॑त ।
अ॒नया॑ । वै । इ॒दम् । विष्णुः । स॒ह॒स्रम् । वक्ष्य॑ते । इति॑ । तस्या॑म् ।
अ॒कल्पे॑ताम् । द्वि॒भाग॑ इति॒ द्वि – भा॒गे । इन्द्रः । तृती॑ये । विष्णुः ।

तत् । वै । ए॒षा । अ॒भ्यनू॑च्यत॒ इत्य॑भि-अ॒नूच्य॑ते । उ॒भा । जि॒ग्यथुः॑ ।
इति॑ । ताम् । वै । ए॒ताम् । अ॒च्छा॒वाकः॑ । 18 (50)

TS 7.1.5.6

ए॒व श॑स॒त्यथ॑ या॒ सह॑स्रतमी॒ सा हो॑त्रे दे॒येति॑ हो॒तारं॑ वा
अ॒भ्यति॑रिच्यते॒ यदति॑रिच्यते॒ होता॑ ऽना॒प्तस्या॑ऽऽ*पयि॒ता ऽथा॑ऽ*हु॒रुन्ने॑त्रे
दे॒येत्यति॑रिक्ता॒ वा ए॒षा सह॑स्रस्यातिरिक्त॒ उन्ने॑त॒र्त्विजा॑मथा॒ऽऽ*हुः
सर्वे॑भ्यः॒ सदस्ये॑भ्यो दे॒येत्यथा॑ऽऽहु॒रुदा॑ कृ॒त्या सा व॑शं
चरे॑दित्यथा॒ऽऽ*हुर्ब्र॑ह्मणे॒ चाग्नी॑धे च दे॒येति॑ – [] 19

TS 7.1.5.6 - Padam

ए॒व । श॑स॒सति॑ । अथ॑ । या । सह॑स्रतमीति॒ सहस्र॑ – तमी॒ । सा ।
हो॒त्रे । दे॒या । इति॑ । हो॒तारम् । वै । अ॒भ्यति॑रिच्यत
इत्य॑भि-अ॒तिरिच्य॑ते । यत् । अ॒तिरिच्य॑त॒ इत्यति॑ – रिच्य॑ते । होता॑ ।
अ॒नाप्त॑स्य । आ॒पयि॒ता । अथ॑ । आ॒हुः । उ॒न्नेत्र॑ इत्युत् – ने॒त्रे ।
दे॒या । इति॑ । अ॒तिरिक्ते॑त्यति॒ – रिक्ता॑ । वै । ए॒षा । सह॑स्रस्य ।
अ॒तिरिक्त॑ इत्यति॒ – रिक्तः॑ । उ॒न्नेते॑त्युत् – ने॒ता । ऋ॒त्विजा॑म् ।

अथ॑ । आ॒हुः॑ । सर्वे॑भ्यः । सद॒स्ये॑भ्यः । दे॒या॑ । इति॑ । अथ॑ ।
आ॒हुः॑ । उ॒दा॒कृ॒त्ये॒त्युत् – आ॒कृ॒त्या॑ । सा । व॒शम् । च॒रेत् । इति॑ ।
अथ॑ । आ॒हुः॑ । ब्र॒ह्म॒णे॑ । च॒ । अ॒ग्नी॒ध इत्य॑ग्नि – इ॒धे॑ । च॒ । दे॒या॑ ।
इति॑ । 19 (50)

TS 7.1.5.7

द्वि॒भा॒गं ब्र॒ह्म॒णे तृ॒ती॒यम॒ग्नी॒ध ऐ॒न्द्रो वै ब्र॒ह्मा वै॒ष्ण॒वोऽग्नी॒द्यथै॒व
ता॒वक॑ल्पेतामित्यथा ऽऽ*हु॒र्या क॒ल्या॒णी ब॒हुरू॒पा सा दे॒येत्य॑था
ऽऽ*हु॒र्या द्वि॒रूपो॑भयतएनी सा दे॒येति॑ स॒हस्र॑स्य परिगृहीत्यै तद्वा
ए॒तत् स॒हस्र॑स्याऽय॒नञ् स॒हस्र॑ स्तो॒त्री॒याः स॒हस्रं॑ दक्षि॒णाः
स॒हस्र॑स॒मि॒तः सु॒वर्गो॑ लो॒कः सु॒वर्ग॑स्य लो॒कस्या॑भिजित्यै ॥ 20

TS 7.1.5.7 - Padam

द्वि॒भा॒गमि॒ति द्वि – भा॒गम् । ब्र॒ह्म॒णे॑ । तृ॒ती॒यम् । अ॒ग्नी॒ध
इत्य॑ग्नि– इ॒धे॑ । ऐ॒न्द्रः । वै । ब्र॒ह्मा । वै॒ष्ण॒वः । अ॒ग्नी॒दि॒त्य॒ग्नि–इत् ।
यथा॑ । ए॒व । तौ । अ॒क॒ल्पे॒ताम् । इति॑ । अथ॑ । आ॒हुः॑ । या ।
क॒ल्या॒णी । ब॒हुरू॒पेति॑ बहु – रू॒पा । सा । दे॒या॑ । इति॑ । अथ॑ ।

आहुः । या । द्विरूपेति द्वि – रूपा । उभयतएनीत्युभयतः – एनी ।
सा । देया । इति । सहस्रस्य । परिगृहीत्या इति परि-गृहीत्यै । तत् ।
वै । एतत् । सहस्रस्य । अयनम् । सहस्रम् । स्तोत्रीयाः । सहस्रम् ।
दक्षिणाः । सहस्रसंमित इति सहस्र – संमितः ।
सुवर्ग इति सुवः – गः । लोकः । सुवर्गस्येति सुवः – गस्य ।
लोकस्य । अभिजित्या इत्यभि – जित्यै ॥ 20 (47) (अब्रवी – च्च
– तदन्तरिक्षं – ददात्य – छावाक – श्च देयेति –

सप्तचत्वारिंशच्च) (A5)

TS 7.1.6.1

सोमो वै सहस्रमविन्दत् तमिन्द्रो ऽन्वविन्दत् तौ यमो न्यागच्छत्
तावब्रवीदस्तु मेऽन्नाऽपीत्यस्तु ही(3) इत्यब्रूतां स यम एकस्यां
वीर्यं पर्यपश्यदियं वा अस्य सहस्रस्य वीर्यं बिभर्तीति
तावब्रवीदियं ममास्त्वेतद्-युवयोरिति तावब्रूतां सर्वे वा
एतदेतस्यां वीर्यं – [] 21

TS 7.1.6.1 - Padam

सोमः॑ । वै । सह॑स्रम् । अ॒वि॒न्द॒त् । तम् । इन्द्रः॑ । अ॒न्वि॒ति॑ ।
अ॒न्वि॒न्द॒त् । तौ । यमः॑ । न्याग॑च्छदिति॒ नि – आग॑च्छत् । तौ ।
अ॒ब्र॒वीत् । अस्तु॑ । मे । अत्र॑ । अपी॑ति । इति॑ । अस्तु॑ । ही(३) ।
इति॑ । अ॒ब्रू॒ताम् । सः । यमः॑ । एक॑स्याम् । वी॒र्य॑म् । परी॑ति ।
अ॒पश्य॑त् । इ॒यम् । वै । अ॒स्य । सह॑स्रस्य । वी॒र्य॑म् । बि॒भर्ति॑ । इति॑ ।
तौ । अ॒ब्र॒वीत् । इ॒यम् । मम॑ । अस्तु॑ । ए॒तत् । यु॒वयोः॑ । इति॑ । तौ ।
अ॒ब्रू॒ताम् । सर्वे॑ । वै । ए॒तत् । ए॒तस्या॑म् । वी॒र्य॑म् । 21 (50)

TS 7.1.6.2

परि॑ प॒श्यामोऽ॒श॒मा ह॒राम॑हा इति॒ तस्या॑म॒श॒माऽह॑रन्त॒ ताम॑प्सु
प्रा॒ज्वेश॑यन्थ् सोमा॑योदेहीति॒ सा रोहि॑णी पि॒ङ्गलै॑कहायनी॒ रूपं॑ कृ॒त्वा
त्रय॑स्त्रि॒श॒ता च॒ त्रिभि॑श्च॒ शतैः॑ स॒होदै॑त् तस्मा॒द्-रोहि॑ण्या
पि॒ङ्गल॑यैकहायन्या॒ सोमं॑ क्रीणीयाद्य॒ एवं॑ वि॒द्वान् रोहि॑ण्या
पि॒ङ्गल॑यैकहायन्या॒ सोमं॑ क्रीणाति॒ त्रय॑स्त्रि॒श॒ता चैवा॑स्य
त्रिभि॑श्च – [] 22

TS 7.1.6.2 - Padam

परी॑ति । प॒श्यामः॑ । अ॒श॒म् । ए॒ति । ह॒राम॑है । इ॒ति । तस्या॑म् ।
अ॒श॒म् । ए॒ति । अ॒हर॑न्त । ताम् । अ॒प्स्वि॒त्यप् – सु॑ । प्रे॒ति ।
अ॒वे॒शय॑न् । सोमा॑य । उ॒दे॒ही॒त्युत् – ए॒हि । इ॒ति । सा । रोहि॑णी ।
पि॒ङ्ग॒ला । ए॒क॒हा॒यनी॑त्ये॒क – हा॒यनी॑ । रू॒पम् । कृ॒त्वा ।
त्रय॑स्त्रि॒श॒तेति॑ त्रयः – त्रि॒श॒ता । च । त्रि॒भि॒रिति॑ त्रि – भिः ।
च । श॒तैः । स॒ह । उ॒दै॒दि॒त्युत् – ऐ॒त् । तस्मा॑त् । रोहि॑ण्या ।
पि॒ङ्ग॒लया॑ । ए॒क॒हा॒यन्ये॑त्ये॒क – हा॒यन्या॑ । सोम॑म् । क्री॒णी॒यात् । यः ।
ए॒वम् । वि॒द्वान् । रोहि॑ण्या । पि॒ङ्ग॒लया॑ । ए॒क॒हा॒यन्ये॑त्ये॒क – हा॒यन्या॑ ।
सोम॑म् । क्री॒णाति॑ । त्रय॑स्त्रि॒श॒तेति॑ त्रयः – त्रि॒श॒ता । च । ए॒व ।
अ॒स्य । त्रि॒भि॒रिति॑ त्रि – भिः । च । 22 (50)

TS 7.1.6.3

श॒तैः सोमः॑ क्री॒तो भ॑वति सु॒क्री॑तेन यज॒ते ताम॑प्सु प्रा॒वे॒शय॑-
त्रि॒न्द्रा॒यो॒दे॒हीति॑ सा रोहि॑णी लक्ष्म॒णा प॑ष्ठौही वा॒र्त्र॒घ्नी रू॒पं कृ॒त्वा
त्रय॑स्त्रि॒श॒ता च त्रि॒भिश्च॑ श॒तैः स॒होदै॑त् तस्मा॑द् रोहि॑णीं लक्ष्म॒णां

प॒ष्ठौ॒हीं॑ वा॒र्त्र॒घ्नीं॑ द॒द्याद्य॑ ए॒वं वि॒द्वान् रोहि॑णीं ल॒क्ष्म॒णां प॒ष्ठौ॒हीं॑ वा॒र्त्र॒घ्नीं॑
द॒दाति॑ त्र॒यस्त्रि॑ञ्श॒च्चै॒वास्य॑ त्री॒णि च॑ श॒तानि॑ सा द॒त्ता – [] 23

TS 7.1.6.3 - Padam

श॒तैः । सोमः॑ । क्री॒तः । भ॒वति॑ । सु॒क्री॑तेनेति सु-क्री॒तेन॑ । य॒ज॒ते ।
ताम् । अ॒प्स्वि॒त्यप् – सु । प्रेति॑ । अ॒वे॒श॒यन् । इन्द्रा॑य ।
उ॒दे॒ही॒त्युत् – एहि॑ । इति॑ । सा । रोहि॑णी । ल॒क्ष्म॒णा । प॒ष्ठौ॒ही ।
वा॒र्त्र॒घ्नीति॑ वा॒र्त्र – घ्नी॑ । रू॒पम् । कृ॒त्वा । त्र॒यस्त्रि॑ञ्श॒तेति॑
त्र॒यः – त्रि॑ञ्श॒ता । च॒ । त्रि॒भिरिति॑ त्रि – भिः । च॒ । श॒तैः । स॒ह ।
उ॒दै॒दित्यु॑त् – ऐत् । तस्मा॑त् । रोहि॑णीम् । ल॒क्ष्म॒णाम् । प॒ष्ठौ॒हीम् ।
वा॒र्त्र॒घ्नीमिति॑ वा॒र्त्र – घ्नीम् । द॒द्यात् । यः । ए॒वम् । वि॒द्वान् ।
रोहि॑णीम् । ल॒क्ष्म॒णाम् । प॒ष्ठौ॒हीम् । वा॒र्त्र॒घ्नीमिति॑ वा॒र्त्र – घ्नीम् ।
द॒दाति॑ । त्र॒यस्त्रि॑ञ्श॒दिति॑ त्र॒यः – त्रि॑ञ्श॒त् । च॒ । ए॒व । अ॒स्य ।
त्री॒णि । च॒ । श॒तानि॑ । सा । द॒त्ता । 23 (50)

TS 7.1.6.4

भवति॑ ताम॒प्सु प्रा॒वेशयन्॑ य॒मायो॒देहीति॑ सा ज॒रती॑ मू॒र्खा तज्ज॒घन्या॑
रूपं॑ कृ॒त्वा त्रय॑स्त्रि॒ंशता॑ च त्रि॒भिश्च॑ श॒तैः स॒होदैत्॑ तस्मा॒ज्जरतीं॑
मू॒र्खा तज्ज॒घन्या॑-म॒नुस्तर॑णीं कुर्वीत॑ य ए॒वं वि॒द्वज्जरतीं॑ मू॒र्खा
तज्ज॒घन्या॑-म॒नुस्तर॑णीं कुरु॒ते त्रय॑स्त्रि॒ंशच्चै॒वास्य॑ त्रीणि॑ च श॒तानि॑
साऽमु॒ष्मिँल्लो॒के भवति॑ वागे॒व सह॑स्र॒तमी॑ तस्मा॒ - [] 24

TS 7.1.6.4 - Padam

भवति॑ । ताम् । अ॒प्स्वि॒त्यप् - सु । प्रेति॑ । अ॒वे॒शयन् । य॒माय॑ ।
उ॒देही॒त्युत् - एहि॑ । इति॑ । सा । ज॒रती॑ । मू॒र्खा । तज्ज॒घन्येति॑
तत् - ज॒घन्या॑ । रू॒पम् । कृ॒त्वा । त्रय॑स्त्रि॒ंशतेति॑ त्रयः-त्रि॒ंशता॑ ।
च । त्रि॒भिरिति॑ त्रि - भिः । च । श॒तैः । स॒ह । उ॒दैदित्युत् - ऐत् ।
तस्मा॑त् । ज॒रतीम् । मू॒र्खाम् । तज्ज॒घन्यामिति॑ तत् - ज॒घन्याम् ।
अ॒नुस्तर॑णी॒मित्यनु॑ - स्तर॑णीम् । कुर्वी॑त । यः । ए॒वम् । वि॒द्वान् ।
ज॒रतीम् । मू॒र्खाम् । तज्ज॒घन्यामिति॑ तत् - ज॒घन्याम् ।
अ॒नुस्तर॑णी॒मित्यनु॑ - स्तर॑णीम् । कुरु॒ते ।

त्रयस्त्रिंशदिति त्रयः – त्रिंशत् । च । एव । अस्य । त्रीणि । च ।
शतानि । सा । अमुष्मिन् । लोके । भवति । वाक् । एव ।
सहस्रतमीति सहस्र – तमी । तस्मात् ॥ 24 (50)

TS 7.1.6.5

द्वो देयः सा हि वरः सहस्रमस्य सा दत्ता भवति तस्माद् वरो न
प्रतिगृह्यः सा हि वरः सहस्रमस्य प्रतिगृहीतं भवतीयं वर इति
ब्रूयादथान्यां ब्रूयादियं ममेति तथाऽस्य तत् सहस्र-मप्रतिगृहीतं
भवत्युभयतएनी स्यात् तदाहुरन्यत एनी स्याथ् सहस्रं

परस्तादेतमिति यैव वरः – [] 25

TS 7.1.6.5 - Padam

वरः । देयः । सा । हि । वरः । सहस्रम् । अस्य । सा । दत्ता ।
भवति । तस्मात् । वरः । न । प्रतिगृह्य इति प्रति – गृह्यः । सा ।
हि । वरः । सहस्रम् । अस्य । प्रतिगृहीतमिति प्रति – गृहीतम् ।
भवति । इयम् । वरः । इति । ब्रूयात् । अथ । अन्याम् । ब्रूयात् ।
इयम् । मम । इति । तथा । अस्य । तत् । सहस्रम् ।

अ॒प्र॒ति॒गृ॒ही॒त॒मि॒त्य॒प्र॒ति – गृ॒ही॒त॒म् । भ॒व॒ति॒ ।

उ॒भ॒य॒त॒ए॒नी॒त्यु॒भ॒य॒तः – ए॒नी । स्या॒त् । तत् । आ॒हुः ।

अ॒न्य॒त॒ए॒नी॒त्य॒न्य॒तः – ए॒नी । स्या॒त् । स॒ह॒स्र॑म् । प॒र॒स्ता॑त् । ए॒त॑म् ।

इ॒ति॒ । या॒ । ए॒व । वरः॑ । 25 (50)

TS 7.1.6.6

क॒ल्या॒णी रू॒प॒स॒मृ॒द्धा सा स्या॒त् सा हि वरः॑ स॒मृ॒द्ध्यै
तामु॒त्त॒रे॒णाऽऽ*ग॒नी॒द्ध्रं प॒र्या॒णी॒याऽऽ*ह॒व॒नी॒य॒स्यान्ते॑ द्रो॒ण॒क॒ल॒श॒म॒व
घ्रा॒प॒ये॒दा जिघ्र॑ क॒ल॒शं म॒ह्यु॒रु॒धा॒रा प॒य॒स्व॒त्या त्वा वि॒श॒न्ति॒व॒न्द॒वः
समु॒द्र॒मि॒व सि॒न्ध॒वः सा मा स॒ह॒स्र आ भ॒ज प्र॒ज॒या प॒शु॒भिः स॒ह
पुन॒र्मा ऽऽ*वि॒श॒ता॒द्-र॒यि॒रि॒ति प्र॒ज॒यै॒वैनं॑ प॒शु॒भी र॒य्या स – [] 26

TS 7.1.6.6 - Padam

क॒ल्या॒णी । रू॒प॒स॒मृ॒द्धे॒ति रू॒प – स॒मृ॒द्धा । सा । स्या॒त् । सा । हि ।
वरः॑ । स॒मृ॒द्ध्यै इति॑ सं – ऋ॒द्ध्यै । ताम् । उ॒त्त॒रे॒णे॒त्युत् – त॒रे॒ण ।
आ॒ग॒नी॒द्ध्र॑मि॒त्याग्नि॑ – इ॒द्ध्रम् । प॒र्या॒णी॒येति॑ परि – आ॒नी॒य ।

आ॒ह॒व॒नी॒य॒स्ये॒त्या॑ – ह॒व॒नी॒य॒स्य॑ । अ॒न्ते॑ । द्रो॒ण॒क॒ल॒श॒मि॒ति॑
 द्रो॒ण – क॒ल॒श॒म् । अ॒वे॒ति॑ । घ्रा॒प॒ये॒त् । ए॒ति॑ । जि॒घ्र॑ । क॒ल॒श॒म् ।
 म॒हि । उ॒रु॒धा॒रे॒त्यु॒रु – धा॒रा । प॒य॒स्व॒ती । ए॒ति॑ । त्वा । वि॒श॒न्तु॑ ।
 इ॒न्द्र॒वः॑ । स॒मु॒द्र॒म् । इ॒व । सि॒न्ध॒वः॑ । सा । मा । स॒ह॒स्र॑ । ए॒ति॑ ।
 भ॒ज । प्र॒ज॒ये॒ति॑ प्र – ज॒या॑ । प॒शु॒भि॒रि॒ति॑ प॒शु॒भिः॑ । स॒ह । पु॒नः॑ ।
 मा । ए॒ति॑ । वि॒श॒ता॒त् । र॒यिः॑ । इ॒ति॑ । प्र॒ज॒ये॒ति॑ प्र – ज॒या॑ । ए॒व ।
 ए॒न॒म् । प॒शु॒भि॒रि॒ति॑ प॒शु – भिः॑ । र॒य्या॑ । स॒मि॒ति॑ । 26 (50)

TS 7.1.6.7

–म॒र्द्ध्य॒ति॑ प्र॒जा॒वा॒न् प॒शु॒मा॒न् र॒यि॒मा॒न् भ॒व॒ति॑ य ए॒वं वै॒द॒ त॒या॑
 स॒हाऽऽ*ग्नी॑द्ध्रं प॒रे॒त्य॑ पु॒र॒स्ता॒त् प्र॒ती॒च्यां॑ ति॒ष्ठ॒न्त्यां॑ जु॒हु॒या॒दु॒भा॑
 जि॒ग्य॒थु॒र्न॑ प॒रा ज॒ये॒थे॑ न प॒रा जि॒ग्ये॑ क॒तर॑श्च॒नै॒नौः॑ ।
 इ॒न्द्र॑श्च वि॒ष्णो॑ यद॒प॒स्पृ॒धे॒थां त्रे॒धा स॒ह॒स्रं॑ वि॒ तदै॑र॒ये॒थामि॒ति॑,
 त्रे॒धा॒वि॒भ॒क्तं॑ वि॒ त्रि॒रा॒त्रे स॒ह॒स्रं॑ सा॒ह॒स्री॒मे॒वैनां॑ क॒रो॒ति॑
 स॒ह॒स्र॒स्यै॒वैनां॑ मा॒त्रां॑ – [] 27

TS 7.1.6.7 - Padam

अ॒र्ध॒य॒ति । प्र॒जा॒वा॒नि॒ति॑ प्र॒जा – वा॒न् । प॒शु॒मा॒नि॒ति॑ प॒शु – मा॒न् ।
र॒यि॒मा॒नि॒ति॑ र॒यि – मा॒न् । भ॒व॒ति॑ । यः । ए॒वम् । वे॒द॑ । त॒या॑ । स॒ह॑ ।
आ॒ग्नी॒ध्र॒मि॒त्याग्नि॑ – इ॒ध्र॒म् । प॒रे॒त्ये॒ति॑ प॒रा – इ॒त्य॑ । पु॒र॒स्ता॒त् ।
प्र॒ती॒च्याम् । ति॒ष्ठ॒न्त्याम् । जु॒हु॒यात् । उ॒भा । जि॒ग्य॒थुः । न । प॒रे॒ति॑ ।
ज॒ये॒थे इति॑ । न । प॒रे॒ति॑ । जि॒ग्ये॑ । क॒तरः॑ । च॒न । ए॒नोः॑ ॥ इ॒न्द्रः॑ ।
च । वि॒ष्णो इति॑ । यत् । अ॒प॒स्पृ॒धे॒थाम् । त्रे॒धा । स॒ह॒स्र॒म् । वी॒ति॑ ।
तत् । ऐ॒र॒ये॒थाम् । इति॑ । त्रे॒धा॒वि॒भ॒क्त॒मि॒ति॑ त्रे॒धा – वि॒भ॒क्त॒म् । वै ।
त्रि॒रा॒त्र इति॑ त्रि – रा॒त्रे । स॒ह॒स्र॒म् । सा॒ह॒स्री॒म् । ए॒व । ए॒नाम् ।
क॒रो॒ति॑ । स॒ह॒स्र॒स्य॑ । ए॒व । ए॒नाम् । मा॒त्रा॒म् । 27 (50)

TS 7.1.6.8

क॒रो॒ति॑ रू॒पा॒णि जु॒हो॒ति रू॒पै॒रे॒वै॒नाꣳ स॒म॒र्ध॒य॒ति॑ त॒स्या॑ उ॒पो॒त्था॒य
क॒र्ण॒मा ज॒पे॒दि॒डे र॒न्तेऽदि॒ते॑ स॒र॒स्व॒ति॑ प्रि॒ये प्रे॒य॒सि॑ म॒हि वि॒श्रु॒त्ये॒तानि॑
ते अ॒घ्नि॒ये ना॒मानि॑ सु॒कृतं॑ मा दे॒वेषु॑ ब्रू॒तादि॒ति॑ दे॒वेभ्य॑ ए॒वैन॒मा
वे॒द॒य॒त्य॒न्वे॒नं दे॒वा बु॒द्ध्य॒न्ते॑ ॥ 28

TS 7.1.6.8 - Padam

क॒रोति॑ । रू॒पाणि॑ । जु॒होति॑ । रू॒पैः । ए॒व । ए॒नाम् । स॒मिति॑ ।
अ॒र्ध॒यति॑ । तस्याः॑ । उ॒पो॒त्था॒येत्यु॑प – उ॒त्था॒य । क॒र्णम् । ए॒ति ।
ज॒पेत् । इ॒डे॑ । र॒न्ते॑ । अ॒दि॒ते । स॒र॒स्व॒ति । प्रि॒यै॑ । प्रे॒य॒सि । म॒हि॑ ।
वि॒श्रु॒तीति॑ वि – श्रु॒ति । ए॒तानि॑ । ते । अ॒घ्नि॒ये । ना॒मानि॑ ।
सु॒कृ॒त॒मिति॑ सु – कृ॒तम् । मा । दे॒वेषु॑ । ब्रू॒तात् । इ॒ति । दे॒वेभ्यः॑ ।
ए॒व । ए॒नम् । ए॒ति । वे॒द॒यति॑ । अ॒न्वि॒ति । ए॒नम् । दे॒वाः ।
बु॒द्ध्य॒न्ते ॥ 28 (39) (ए॒तदे॒तस्याँ॑ वी॒र्य॑ – म॒स्य त्रि॒भिश्च॑ – द॒त्ता –
स॒ह॒स्र॒त॒मी तस्मा॑ – दे॒व वरः॑ – सं – मा॒त्रा –
मे॒का॒न्नच॑त्वारि॒ंशच्च॑) (A6)

TS 7.1.7.1

स॒ह॒स्र॒त॒म्या वै यज॑मानः सु॒वर्गं॑ लो॒कमे॑ति सै॒नꣳ सु॒वर्गं॑ लो॒कं
ग॒म॒यति॑ सा मा सु॒वर्गं॑ लो॒कं ग॒म॒येत्या॑ह सु॒वर्गमे॑वैनं लो॒कं ग॒म॒यति॑
सा मा ज्योति॑ष्मन्तं लो॒कं ग॒म॒येत्या॑ह ज्योति॑ष्मन्तमे॒वैनं॑ लो॒कं

गमयति॑ सा मा॒ सर्वान् पु॒ण्यां॑ लो॒कान् गमये॑त्याह॒ सर्वाने॑वैनं॒ पु॒ण्यां॑
लो॒कान् गमयति॑ सा – [] 29

TS 7.1.7.1 - Padam

सह॑स्रत॒म्येति॑ सह॒स्र – त॒म्या॑ । वै । यज॑मानः ।
सुव॑र्गमि॒ति सुवः॑ – गम् । लो॒कम् । ए॒ति । सा । ए॒नम् ।
सुव॑र्गमि॒ति सुवः॑ – गम् । लो॒कम् । गमय॑ति । सा । मा ।
सुव॑र्गमि॒ति सुवः॑ – गम् । लो॒कम् । गमय॑ । इति॑ । आ॒ह ।
सुव॑र्गमि॒ति सुवः॑ – गम् । ए॒व । ए॒नम् । लो॒कम् । गमय॑ति । सा ।
मा । ज्योति॑ष्मन्तम् । लो॒कम् । गमय॑ । इति॑ । आ॒ह । ज्योति॑ष्मन्तम् ।
ए॒व । ए॒नम् । लो॒कम् । गमय॑ति । सा । मा । सर्वान् । पु॒ण्यान् ।
लो॒कान् । गमय॑ । इति॑ । आ॒ह । सर्वान् । ए॒व । ए॒नम् । पु॒ण्यान् ।
लो॒कान् । गमय॑ति । सा । 29 (50)

TS 7.1.7.2

मा प्रति॑ष्ठां गमय प्र॒जया॑ प॒शुभिः॑ सह पुन॑र्माऽऽ वि॒शताद्–रयि॑रिति॒
प्र॒जयै॑वैनं प॒शुभी॑ र॒य्यां प्रति॑ ष्ठापयति प्र॒जावान् प॒शुमान् रयि॑मान्

भवति॑ य॒ एवं॑ वे॒द॒ ताम॒ग्नी॒धे॒ वा ब्र॒ह्म॒णे॒ वा हो॒त्रे वो॒द्गा॒त्रे वा॑ऽ॒ध्व॒र्य॒वे॑
वा दद्या॑त् स॒हस्र॑मस्य॒ सा द॒त्ता भवति॑ स॒हस्र॑मस्य॒ प्रति॑गृहीतं भवति॒
यस्ताम॑विद्वान् – [] 30

TS 7.1.7.2 - Padam

मा । प्रति॑ष्ठामिति॒ प्रति॑ – स्था॒म् । ग॒म॒य । प्र॒ज॒येति॑ प्र – जया॑ ।
प॒शुभि॑रिति॒ प॒शु – भिः॑ । स॒ह । पुनः॑ । मा । एति॑ । वि॒श॒तात् ।
र॒यिः । इति॑ । प्र॒ज॒येति॑ प्र – जया॑ । ए॒व । ए॒न॒म् । प॒शुभि॑रिति॒
प॒शु – भिः॑ । र॒य्याम् । प्र॒तीति॑ । स्था॒प॒य॒ति । प्र॒जा॒वा॒निति॑
प्र॒जा – वा॒न् । प॒शुमा॑निति॒ प॒शु – मा॒न् । र॒यिमा॑निति॒ र॒यि – मा॒न् ।
भवति॑ । यः । ए॒व॒म् । वे॒द॒ । ता॒म् । अ॒ग्नी॒ध इत्य॑ग्नि – इ॒धे॑ । वा ।
ब्र॒ह्म॒णे॑ । वा । हो॒त्रे॑ । वा । उ॒द्गा॒त्र इत्यु॑त् – गा॒त्रे । वा । अ॒ध्व॒र्य॒वे॑ ।
वा । दद्या॑त् । स॒हस्र॑म् । अ॒स्य॒ । सा । द॒त्ता । भवति॑ । स॒हस्र॑म् ।
अ॒स्य॒ । प्रति॑गृहीतमिति॒ प्रति॑ – गृ॒ही॒त॒म् । भवति॑ । यः । ता॒म् ।
अ॒वि॒द्वान् । 30 (50)

TS 7.1.7.3

प्रति॑गृ॒ह्णाति॑ तां प्रति॑गृ॒ह्णीयादे॑काऽसि॑ न सह॒स्रमे॑कां त्वा भू॒तां
प्रति॑ गृ॒ह्णामि॑ न सह॒स्रमे॑का मा भू॒ताऽऽवि॑श मा सह॒स्रमित्ये॑कामे॒वैनानां॑
भू॒तां प्रति॑गृ॒ह्णाति॑ न सह॒स्रं य॑ एवं वेद॑ स्यो॒नाऽसि॑ सु॒षदा॑ सु॒शेवा॑
स्यो॒ना मा ऽऽवि॑श सु॒षदा॑ मा ऽऽवि॑श सु॒शेवा॑ मा ऽऽवि॑शे –[] 31

TS 7.1.7.3 - Padam

प्रति॑गृ॒ह्णातीति॑ प्रति – गृ॒ह्णाति॑ । ताम् । प्रतीति॑ । गृ॒ह्णीयात् । एका॑ ।
अ॒सि । न । सह॒स्रम् । एका॑म् । त्वा । भू॒ताम् । प्रतीति॑ । गृ॒ह्णामि॑ ।
न । सह॒स्रम् । एका॑म् । मा । भू॒ता । एति॑ । वि॒श । मा । सह॒स्रम् ।
इति॑ । एका॑म् । ए॒व । ए॒नाम् । भू॒ताम् । प्रतीति॑ । गृ॒ह्णाति॑ । न ।
सह॒स्रम् । यः । ए॒वम् । वेद॑ । स्यो॒ना । अ॒सि । सु॒षदेति॑ सु – सदा॑ ।
सु॒शेवेति॑ सु – शेवा॑ । स्यो॒ना । मा । एति॑ । वि॒श ।
सु॒षदेति॑ सु – सदा॑ । मा । एति॑ । वि॒श । सु॒शेवेति॑ सु – शेवा॑ ।
मा । एति॑ । वि॒श । 31 (50)

TS 7.1.7.4

–त्याह॑ स्यो॒नै॒वैन॑ सु॒षदा॑ सु॒शेवा॑ भू॒ताऽऽ वि॒शति॑ नैन॑ हिन॒स्ति
ब्र॒ह्मवा॒दिनो॑ वदन्ति॑ स॒हस्र॑ स॒हस्र॑त॒म्यन्वे॒ती(३) स॒हस्र॑त॒मी
स॒हस्रा(३)मि॒ति यत् प्रा॒चीमु॒थ् सृ॒जेथ् स॒हस्र॑ स॒हस्र॑त॒म्यन्वि॒यात्
तथ् स॒हस्र॑म॒प्रजा॑त्र॒ सु॒वर्गं॑ लो॒कं न प्र जा॑नीयात् प्र॒तीची॒मुथ्–
सृ॒जति॑ ता॒ स॒हस्र॑मनु॒ पर्या॑वर्तते सा प्र॒जान॑ती सु॒वर्गं॑ लो॒कमे॒ति
यज॑मान () –म॒भ्युथ् सृ॒जति॑ क्षि॒प्रे स॒हस्रं॑ प्र जा॑यत उत्त॒मा नी॒यते॑
प्रथ॒मा दे॒वान् गच्छ॑ति ॥ 32

TS 7.1.7.4 - Padam

इति॑ । आ॒ह । स्यो॒ना । ए॒व । ए॒नम् । सु॒षदे॑ति सु – सदा॑ ।
सु॒शेवे॑ति सु – शेवा॑ । भू॒ता । ए॒ति । वि॒शति॑ । न । ए॒नम् ।
हि॒नस्ति॑ । ब्र॒ह्मवा॒दिन॑ इति॑ ब्र॒ह्म – वा॒दिनः॑ । वद॑न्ति । स॒हस्र॑म् ।
स॒हस्र॑त॒मीति॑ स॒हस्र॑ – त॒मी । अ॒न्वि॒ति । ए॒ती(३) । स॒हस्र॑त॒मीमि॑ति
स॒हस्र॑ – त॒मीम् । स॒हस्रा(३)म् । इति॑ । यत् । प्रा॒चीम् ।
उ॒थ्सृ॒जेदि॑त्युत् – सृ॒जेत् । स॒हस्र॑म् । स॒हस्र॑त॒मीति॑ स॒हस्र॑ – त॒मी ।

अ॒न्वि॒ति॑ । इ॒या॒त् । तत् । स॒ह॒स्र॑म् । अ॒प्र॒ज्ञा॒त्र॒मि॒त्य॒प्र॑ – ज्ञा॒त्र॒म् ।
 सु॒व॒र्ग॒मि॒ति॑ सु॒वः॑ – ग॒म् । लो॒क॒म् । न । प्रे॒ति॑ । जा॒नी॒या॒त् ।
 प्र॒ती॒ची॑म् । उ॒दि॒ति॑ । सृ॒ज॒ति॑ । ता॒म् । स॒ह॒स्र॑म् । अ॒न्वि॒ति॑ ।
 पर्या॑व॒र्त॒त इति॑ परि – आ॒व॒र्त॒ते । सा । प्र॒जा॒न॒ती॒ति॑ प्र – जा॒न॒ती॑ ।
 सु॒व॒र्ग॒मि॒ति॑ सु॒वः॑ – ग॒म् । लो॒क॒म् । ए॒ति॑ । य॒ज॒मा॒न॒म् () । अ॒भि॒ ।
 उ॒दि॒ति॑ । सृ॒ज॒ति॑ । क्षि॒प्रे॑ । स॒ह॒स्र॑म् । प्रे॒ति॑ । जा॒य॒ते॑ ।
 उ॒त्त॒मे॒त्यु॒त् – त॒मा॑ । नी॒य॒ते॑ । प्र॒थ॒मा॑ । दे॒वा॒न् । ग॒च्छ॒ति॑ ॥ 32 (62)
 (लो॒का॒न् ग॒म॒य॒ति॑ सा – ऽवि॒द्वान् – सु॒शे॒वा मा॒ऽऽ वि॒श – य॒ज॒मा॒नं
 – द्वा॒द॒श च॑) (A7)

TS 7.1.8.1

अ॒त्रि॒र॒द॒दा॒दौ॒र्वा॒य प्र॒जां पु॒त्र॒का॒मा॒य स रि॒रि॒चा॒नो॒ऽम॒न्य॒त निर्वी॑र्यः
 शि॒थि॒लो या॒त॒या॒मा स ए॒तं च॒तू॒रा॒त्र-म॒प॒श्य॒त् त॒माऽह॑रत् ते॒ना॒य॒ज॒त
 ततो॑ वै त॒स्य॑ च॒त्वा॒रो वी॒रा आ॒ऽजा॒य॒न्त सु॒हो॒ता सू॒द्वा॒ता स्व॑द॒ध्व॒र्युः
 सु॒स॒भे॒यो य ए॒वं वि॒द्वान् च॒तू॒रा॒त्रे॒ण य॒ज॒त आ॒ऽस्य॑ च॒त्वा॒रो वी॒रा

जा॒यन्ते॑ सु॒हो॒ता॒ सू॒द्रा॒ता॒ स्व॒ध्व॒र्युः॑ सु॒स॒भे॒यो॒ ये च॑तुर्वि॒ं॒शाः॑

पव॑माना ब्रह्मवर्चसं त – [] 33

TS 7.1.8.1 - Padam

अ॒त्रिः॑ । अ॒द॒दा॒त् । औ॒र्वा॒य । प्र॒जा॒मि॒ति॑ प्र – जा॒म् ।

पु॒त्रका॑मायेति पु॒त्र – का॒मा॒य । सः॑ । रि॒रि॒चा॒नः॑ । अ॒म॒न्य॒त ।

निर्वी॑र्य इति निः – वी॒र्यः॑ । शि॒थि॒लः॑ । या॒तया॑मेति या॒त – या॒मा ।

सः॑ । ए॒तम् । च॒तू॒रा॒त्रमि॑ति चतुः – रा॒त्रम् । अ॒प॒श्य॒त् । तम् । ए॒ति॑ ।

अ॒हर॒त् । ते॒न । अ॒य॒ज॒त । ततः॑ । वै । तस्य॑ । च॒त्वा॒रः॑ । वी॒राः॑ ।

ए॒ति॑ । अ॒जा॒य॒न्त । सु॒हो॒तेति॑ सु – हो॒ता । सू॒द्रा॒तेति॑ सु – उ॒द्रा॒ता ।

स्व॒ध्व॒र्युरि॑ति सु – अ॒ध्व॒र्युः॑ । सु॒स॒भे॒य इति॑ सु – स॒भे॒यः॑ ।

यः॑ । ए॒वम् । वि॒द्वान् । च॒तू॒रा॒त्रेणे॑ति चतुः – रा॒त्रेण॑ । य॒ज॒ते । ए॒ति॑ ।

अ॒स्य॑ । च॒त्वा॒रः॑ । वी॒राः॑ । जा॒य॒न्ते । सु॒हो॒तेति॑ सु – हो॒ता ।

सू॒द्रा॒तेति॑ सु – उ॒द्रा॒ता । स्व॒ध्व॒र्युरि॑ति सु – अ॒ध्व॒र्युः॑ । सु॒स॒भे॒य

इति॑ सु – स॒भे॒यः॑ । ये । च॒तुर्वि॒ं॒शा इति॑ चतुः – वि॒ं॒शाः॑ ।

पव॑मानाः । ब्रह्मवर्चसमिति ब्रह्म – वर्च॑सम् । तत् । 33 (50)

TS 7.1.8.2

– द्य उद्यन्तः स्तोमाः श्रीः सा अत्रि॑ श्रद्धादे॒वं य॑ज॒मानं च॒त्वारि॑
वीर्या॑णि नोपा॑नमन् तेज इन्द्रि॑यं ब्रह्मवर्च॑स-मन्नाद्य॑ स
एता॑श्चतुर॑श्चतुष्टो॒मान् सो॒मान-प॑श्यत् ताना॑हरत् तैर॑यजत तेज ए॒व
प्रथ॑मेना अ॒रुन्धेन्द्रि॑यं द्विती॑येन ब्रह्मवर्च॑सं तृती॑येना॒न्नाद्यं चतु॑र्थेन य
ए॒वं वि॒द्वाश्चतुर॑श्चतुष्टो॒मान् सो॒माना॑हरति तैर॑यजते तेज ए॒व ()
प्रथ॑मेनाव रुन्ध इन्द्रि॑यं द्विती॑येन ब्रह्मवर्च॑सं तृती॑येना॒न्नाद्यं चतु॑र्थेन
यामे॒वात्रि॑र्. ऋद्धि॒माद्ध॑र्नोत् तामे॒व यज॑मान ऋद्ध॑ध्नोति ॥ 34

TS 7.1.8.2 - Padam

ये । उद्यन्त इत्युत् – यन्तः । स्तोमाः । श्रीः । सा । अत्रिम् ।
श्रद्धादे॒वमि॑ति श्रद्धा – दे॒वम् । यज॑मानम् । च॒त्वारि॑ । वीर्या॑णि । न ।
उपेति॑ । अ॒नम॑न् । तेजः । इन्द्रि॑यम् । ब्रह्मवर्च॑समि॒ति ब्रह्म-वर्च॑सम् ।
अ॒न्नाद्य॑मित्यन्न – अद्यम् । सः । ए॒तान् । च॒तुरः । चतुष्टो॒मानि॑ति
चतुः – स्तो॒मान् । सो॒मान् । अ॒पश्य॑त् । तान् । ए॒ति । अ॒हरत् ।
तैः । अ॒यज॑त । तेजः । ए॒व । प्र॒थमे॑न । अ॒वेति॑ । अ॒रुन्ध॑ । इन्द्रि॑यम् ।

द्वि॒तीये॑न । ब्र॒ह्मव॑र्च॒समि॑ति ब्र॒ह्म – वर्च॑सम् । तृ॒तीये॑न ।
 अ॒न्नाद्य॑मि॒त्यन्न॑ – अद्य॑म् । च॒तुर्थे॑न । यः । ए॒वम् । वि॒द्वान् । च॒तुरः॑ ।
 च॒तुष्टो॑मा॒निति॑ च॒तुः – स्तो॒मान् । सो॒मान् । आ॒हर॑ती॒त्या – हर॑ति ।
 तैः । यज॑ते । तेजः॑ । ए॒व () । प्र॒थमे॑न । अ॒वेति॑ । रु॒न्धे । इ॒न्द्रि॒यम् ।
 द्वि॒तीये॑न । ब्र॒ह्मव॑र्च॒समि॑ति ब्र॒ह्म – वर्च॑सम् । तृ॒तीये॑न ।
 अ॒न्नाद्य॑मि॒त्यन्न॑ – अद्य॑म् । च॒तुर्थे॑न । या॒म् । ए॒व । अ॒त्रिः । ऋ॒द्धिम् ।
 आ॒र्द्ध्ना॑त् । ता॒म् । ए॒व । यज॑मानः । ऋ॒द्ध॒नोति॑ ॥ 34 (68)

(तत्-तेज एवा-ष्टदश च) (A8)

TS 7.1.9.1

ज॒मद॑ग्निः पु॒ष्टिका॑म-श्च॒तूरा॑त्रेणा-यज॑त स ए॒तान् पोषा॑ अ॒पुष्य॑त्
 तस्मा॑त् प॒लितौ॑ जा॒मद॑ग्नियौ न सं जा॒नाते॑ ए॒ताने॒व पोषा॑न् पु॒ष्यति॑ य
 एवं वि॒द्वान् च॒तूरा॑त्रेण यज॑ते पु॒रोडा॑शिन्य॒ उप॒सदो॑ भव॒न्ति प॒शवो॑ वै
 पु॒रोडा॑शः प॒शूने॒वाव रु॒न्धे ऽन्नं॑ वै पु॒रोडा॑शोऽन्न॒मेवा॑व रु॒न्धे ऽन्ना॑दः
 प॒शुमा॑न् भव॒ति य एवं॑ वि॒द्वान् च॒तूरा॑त्रेण यज॑ते ॥ 35

TS 7.1.9.1 - Padam

ज॒मद॑ग्निः । पु॒ष्टि॒काम॑ इति पु॒ष्टि॒ – का॒मः । च॒तू॒रा॒त्रेणे॑ति
चतुः – रा॒त्रेण॑ । अ॒यज॑त । सः । ए॒तान् । पो॒षान् । अ॒पु॒ष्यत् ।
तस्मा॑त् । प॒लि॒तौ । जा॒मद॑ग्नियौ । न । स॒मि॒ति॒ । जा॒ना॒ते इति॑ ।
ए॒तान् । ए॒व । पो॒षान् । पु॒ष्य॒ति॒ । यः । ए॒वम् । वि॒द्वान् ।
च॒तू॒रा॒त्रेणे॑ति चतुः – रा॒त्रेण॑ । यज॑ते । पु॒रो॒डा॒शिन्यः॑ । उ॒प॒स॒द
इ॒त्यु॒प – स॒दः । भ॒व॒न्ति॒ । प॒श॒वः । वै । पु॒रो॒डा॒शः । प॒शून् । ए॒व ।
अ॒वेति॑ । रु॒न्धे । अ॒न्नम् । वै । पु॒रो॒डा॒शः । अ॒न्नम् । ए॒व । अ॒वेति॑ ।
रु॒न्धे । अ॒न्ना॒द इ॒त्य॒न्न – अ॒दः । प॒शु॒मा॒नि॒ति॒ प॒शु – मा॒न् । भ॒व॒ति॒ ।
यः । ए॒वम् । वि॒द्वान् । च॒तू॒रा॒त्रेणे॑ति चतुः-रा॒त्रेण॑ । यज॑ते ॥ 35 (48)

(ज॒मद॑ग्नि – र॒ष्टा॒च॒त्वा॒रि॒श॒त्) (A9)

TS 7.1.10.1

सँ॒व॒त्स॒रो वा इ॒दमे॑क आसी॒थ् सोऽ॒काम॑य॒त॒तून्थ् सृ॑जे॒येति॑ स ए॒तं
पञ्च॑रा॒त्रम॑प॒श्यत् त॒माऽ॒हर॑त् तेना॒यज॑त ततो॒ वै स ऋ॑तून॒सृज॑त य
ए॒वं वि॒द्वान् पञ्च॑रा॒त्रेण॑ यज॑ते प्रै॒व जा॑यते त ऋ॒तवः॑ सृ॒ष्टा न

व्या॑वर्त॒न्त त ए॒तं प॒ञ्च॒रा॒त्रम॑प॒श्यन् तमा॑ऽह॒रन् तेना॑यजन्त॒ ततो॑
वै ते व्यावर्तन्त- [] 36

TS 7.1.10.1 - Padam

सँव॑त्स॒र इति॑ सं – व॒त्स॒रः । वै । इ॒दम् । ए॒कः । आ॒सी॒त् । सः ।
अ॒काम॑यत । ऋ॒तून् । सृ॒जे॒य । इति॑ । सः । ए॒तम् ।
प॒ञ्च॒रा॒त्रमि॑ति पञ्च – रा॒त्रम् । अ॒प॒श्य॒त् । तम् । ए॒ति । अ॒ह॒र॒त् ।
तेन॑ । अ॒य॒ज॒त । ततः॑ । वै । सः । ऋ॒तून् । अ॒सृ॒ज॒त । यः । ए॒वम् ।
वि॒द्वान् । प॒ञ्च॒रा॒त्रेणे॑ति पञ्च – रा॒त्रेण॑ । य॒ज॒ते । प्रेति॑ । ए॒व ।
जा॒य॒ते । ते । ऋ॒त॒वः । सृ॒ष्टाः । न । व्याव॑र्त॒न्तेति॑ वि – आ॒वर्त॑न्त ।
ते । ए॒तम् । प॒ञ्च॒रा॒त्रमि॑ति पञ्च – रा॒त्रम् । अ॒प॒श्य॒न् । तम् । ए॒ति ।
अ॒ह॒र॒न् । तेन॑ । अ॒य॒ज॒न्त । ततः॑ । वै । ते ।
व्याव॑र्त॒न्तेति॑ वि – आ॒वर्त॑न्त । 36 (50)

TS 7.1.10.2

य ए॒वं वि॒द्वान् प॒ञ्च॒रा॒त्रेण॑ य॒ज॒ते वि पा॒प्म॒ना भ्रातृ॑व्ये॒णाऽऽ* वर्त॑ते
सा॒र्व॒से॒निः शौ॒चे॒योऽकाम॑यत प॒शु॒मान्थ् स्या॒मि॒ति स ए॒तं

पञ्च॑रा॒त्रमा॑ऽहर॒त् तेना॑ऽयज॒त ततो॑ वै स॒ सह॑स्रं प॒शून् प्रा॑ऽऽ*प्नो॒द्य
ए॒वं वि॒द्वान् पञ्च॑रा॒त्रेण॑ यज॒ते प्र॒ सह॑स्रं प॒शूना॑प्नोति ब॒बरः
प्रा॒वा॒ह॒णि-र॒काम॑यत वा॒चः प्र॒व॒दि॒ता स्या॒मि॒ति स॒ ए॒तं

पञ्च॑रा॒त्रमा – [] 37

TS 7.1.10.2 - Padam

यः । ए॒वम् । वि॒द्वान् । पञ्च॑रा॒त्रेणे॑ति पञ्च-रा॒त्रेण॑ । यज॒ते । वी॒ति ।
पा॒प्म॒ना ॥ भ्रातृ॑व्येण । ए॒ति । वर्त॑ते । सा॒र्व॒से॒निरि॒ति सा॒र्व – से॒निः ।
शौ॒चे॒यः । अ॒काम॑यत । प॒शु॒मा॒नि॒ति प॒शु – मा॒न् । स्या॒म् । इ॒ति ।
सः । ए॒तम् । पञ्च॑रा॒त्रमि॑ति पञ्च – रा॒त्रम् । ए॒ति । अ॒हर॒त् । ते॒न ।
अ॒यज॑त । ततः॑ । वै । सः । स॒ह॒स्र॑म् । प॒शून् । प्रे॒ति । आ॒प्नो॒त् ।
यः । ए॒वम् । वि॒द्वान् । पञ्च॑रा॒त्रेणे॑ति पञ्च-रा॒त्रेण॑ । यज॒ते । प्रे॒ति ।
स॒ह॒स्र॑म् । प॒शून् । आ॒प्नो॒ति । ब॒बरः । प्रा॒वा॒ह॒णिः । अ॒काम॑यत ।
वा॒चः । प्र॒व॒दि॒ते॒ति प्र – व॒दि॒ता । स्या॒म् । इ॒ति । सः । ए॒तम् ।
पञ्च॑रा॒त्रमि॑ति पञ्च – रा॒त्रम् । ए॒ति । 37 (50)

TS 7.1.10.3

अ॒हरत् ते॒नाय॑जत॒ ततो॑ वै स॒ वाचः॑ प्र॒वदि॒ताऽभ॑वद्य॒ एवं वि॒द्वान्
पञ्च॑रात्रेण॒ यज॑ते प्र॒वदि॒तैव॑ वा॒चो भ॑वत्यथो॒ एनं॑ वा॒चस्प॑ति-
रि॒त्याहु॑रनाप्त-श्चतू॒रात्रो॑ऽतिरिक्तः॒ षड्-रा॒त्रोऽथ॑ वा ए॒ष संप्र॑ति य॒ज्ञो
यत् पञ्च॑रात्रो य॒ एवं वि॒द्वान् पञ्च॑रात्रेण॒ यज॑ते संप्र॒त्येव॑ य॒ज्ञेन॑
यज॑ते पञ्च॑रात्रो भ॒वति॑ पञ्च॒ वा ऋ॒तवः॑ सँव॒त्सर॑ - [] 38

TS 7.1.10.3 - Padam

अ॒हरत् । ते॒न । अ॒यज॑त । ततः॑ । वै । सः । वा॒चः । प्र॒वदि॒तेति॑
प्र - व॒दिता॑ । अ॒भवत् । यः । ए॒वम् । वि॒द्वान् । पञ्च॑रात्रेणेति॑
पञ्च - रा॒त्रेण॑ । यज॑ते । प्र॒वदि॒तेति॑ प्र - व॒दिता॑ । ए॒व । वा॒चः ।
भ॒वति॑ । अथो॒ इति॑ । ए॒नम् । वा॒चः । प॒तिः । इति॑ । आ॒हुः ।
अ॒नाप्तः॑ । चतू॒रात्र॑ इति॑ चतुः - रा॒त्रः । अति॑रिक्त॒ इत्य॑ति - रि॒क्तः ।
षड्रा॒त्र इति॑ षट् - रा॒त्रः । अथ॑ । वै । ए॒षः । संप्र॑तीति॑ सं - प्र॒ति ।
य॒ज्ञः । यत् । पञ्च॑रात्र॒ इति॑ पञ्च - रा॒त्रः । यः । ए॒वम् । वि॒द्वान् ।
पञ्च॑रात्रेणेति॑ पञ्च - रा॒त्रेण॑ । यज॑ते । सम्प्र॑तीति॑ सं - प्र॒ति ।

ए॒व । य॒ज्ञेन॑ । य॒ज॒ते । प॒ञ्च॒रा॒त्र इति॑ पञ्च – रा॒त्रः । भ॒व॒ति ।
प॒ञ्च । वै । ऋ॒त॒वः । सँ॒व॒थ्स॒र इति॑ सं – व॒थ्स॒रः । 38 (50)

TS 7.1.10.4

ऋ॒तु॒ष्वे॒व सँ॒व॒थ्स॒रे प्र॒ति ति॒ष्ठ॒त्य॒थो प॒ञ्चाक्ष॑रा प॒ङ्क्तिः॑ पा॒ङ्क्तौ
य॒ज्ञो य॒ज्ञमे॒वाव रु॒न्धे त्रि॒वृ॒द॒ग्नि॒ष्टो॒मो भ॒व॒ति तेज॑ ए॒वाव रु॒न्धे
प॒ञ्च॒द॒शो भ॒व॒तीन्द्रि॒यमे॒वाव रु॒न्धे स॒प्त॒द॒शो भ॒व॒त्य॒न्नाद्य॑स्या-व॒रु॒द्ध्यै
अ॒थो प्रै॒व तेन॑ जा॒य॒ते प॒ञ्च॒वि॒ंशौ ऽग्नि॑ष्टो॒मो भ॒व॒ति प्र॒जाप॑ते॒राप्त्यै॑
महा॒व्र॒त॒वा-न॒न्नाद्य॑स्या-व॒रु॒द्ध्यै वि॒श्वजि॑त् सर्व॒पृ॒ष्ठो- ऽति॒रा॒त्रो भ॒व॒ति
सर्व॑स्याभि॒जित्यै॑ () ॥ 39

TS 7.1.10.4 - Padam

ऋ॒तु॒षु । ए॒व । सँ॒व॒थ्स॒र इति॑ सं – व॒थ्स॒रे । प्र॒ती॒ति । ति॒ष्ठ॒न्ति ।
अ॒थो इति॑ । प॒ञ्चाक्ष॑रेति पञ्च – अ॒क्ष॒रा । प॒ङ्क्तिः॑ । पा॒ङ्क्तः॑ । य॒ज्ञः ।
य॒ज्ञम् । ए॒व । अ॒वे॒ति । रु॒न्धे । त्रि॒वृ॒दि॒ति त्रि – वृ॒त् । अ॒ग्नि॒ष्टो॒म
इ॒त्य॒ग्नि – स्तो॒मः । भ॒व॒ति । तेजः॑ । ए॒व । अ॒वे॒ति । रु॒न्धे ।
प॒ञ्च॒द॒श इति॑ पञ्च – द॒शः । भ॒व॒ति । इन्द्रि॒यम् । ए॒व । अ॒वे॒ति ।

रु॒न्धे । स॒प्त॒द॒श इति॑ स॒प्त – द॒शः । भ॒वति॑ ।
अ॒न्ना॒द्यस्ये॑त्य॒न्न – अ॒द्यस्य॑ । अ॒वरु॑द्ध्य॒या इत्य॑व – रु॒द्ध्यै ।
अथो॑ इति॑ । प्रेति॑ । ए॒व । तेन॑ । जा॒यते॑ । प॒ञ्चवि॑ंश इति॑
प॒ञ्च – वि॑ंशः । अ॒ग्नि॒ष्टोम॑ इत्य॒ग्नि – स्तो॒मः । भ॒वति॑ ।
प्र॒जाप॑तेरिति॑ प्र॒जा-प॑तेः । आ॒प्त्यै॑ ॥ म॒हा॒व्र॒तवा॑निति॑ म॒हा॒व्र॒त-वा॑न् ।
अ॒न्ना॒द्यस्ये॑त्य॒न्न – अ॒द्यस्य॑ । अ॒वरु॑द्ध्य॒या इत्य॑व – रु॒द्ध्यै ।
वि॒श्वजि॑दिति॑ वि॒श्व – जि॒त् । स॒र्वपृ॑ष्ठ इति॑ स॒र्व – पृ॑ष्ठः ।
अ॒तिरा॑त्र इत्य॒ति – रा॑त्रः । भ॒वति॑ । स॒र्वस्य॑ । अ॒भिजि॑त्या
इत्य॒भि-जि॑त्यै () ॥ 39 (50) (ते॑ व्या॒वर्त॑न्त – प्र॒वदि॑ता स्या॒मिति॑
स ए॒तं प॑ञ्च॒रात्र॑मा – स॒वँ॑त्स॒रो-भि॑जि॒त्यै) (A10)

TS 7.1.11.1

दे॒वस्य॑त्वा स॒वितुः॑ प्र॒सवे॑ऽश्वि॒नोर्बा॒हुभ्यां॑ पू॒ष्णो ह॑स्ता॒भ्यामा॑ द॒द
इ॒माम॑गृ॒भ्णन् र॑श॒नामृ॑तस्य॒ पूर्वं॑ आ॒युषि॑ वि॒दथे॑षु क॒व्या ।
तया॑ दे॒वाः सु॒तमा॑ ब॒भूवुर् ऋ॒तस्य॑ सा॒मन्थ्-स॒रमा॑रप॒न्ती ॥

अ॒भि॒धा॒ अ॒सि॒ भु॒व॒न॒म॒सि॒ य॒न्ता॒ऽसि॒ ध॒र्ता॒ऽसि॒ सौ॒ऽग्निं॑ वै॒श्वा॒न॒र॒ꣳ
स॒प्र॒थ॒सं॑ ग॒च्छ॒ स्वा॒हा॒कृ॒तः॑ पृ॒थि॒व्यां॑ य॒न्ता॒ रा॒ड् य॒न्ता॒ऽसि॒ य॒म॒नो
ध॒र्ता॒ऽसि॒ ध॒रु॒णः॑ () कृ॒ष्यै॑ त्वा॒ क्षे॒मा॒य॒ त्वा॒ र॒य्यै॑ त्वा॒ पो॒षाय॑ त्वा
पृ॒थि॒व्यै॑ त्वा॒ ऽन्त॑रि॒क्षाय॑ त्वा॒ दि॒वे॒ त्वा॒ स॒ते॒ त्वा॒ऽस॒ते॒ त्वा॒द्भ्य॑स्त्वौ –
ष॒धी॒भ्य॑स्त्वा॒ वि॒श्वे॑भ्य॒स्त्वा॒ भू॒ते॒भ्यः॑ ॥ 40

TS 7.1.11.1 - Padam

दे॒व॒स्य॑ । त्वा॒ । स॒वि॒तुः॑ । प्र॒स॒व॒ इति॑ प्र – स॒वे॒ । अ॒श्वि॒नौः॑ ।
बा॒हु॒भ्या॒मि॒ति॑ बा॒हु – भ्या॒म् । पू॒ष्णः॑ । ह॒स्ता॒भ्या॒म् । ए॒ति॑ । द॒दे॒ ।
इ॒मा॒म् । अ॒गृ॒भ्ण॒न् । र॒श॒ना॒म् । ऋ॒त॒स्य॑ । पू॒र्वे॑ । आ॒यु॒षि॑ । वि॒द॒थे॑षु ।
क॒व्या॑ ॥ त॒या॑ । दे॒वाः॑ । सु॒त॒म् । ए॒ति॑ । ब॒भू॒वुः॑ । ऋ॒त॒स्य॑ । सा॒म॒न् ।
स॒र॒म् । आ॒र॒प॒न्ती॑त्या – र॒प॒न्ती॑ ॥ अ॒भि॒धा॒ इत्य॑भि – धाः॑ । अ॒सि॒ ।
भु॒व॒न॒म् । अ॒सि॒ । य॒न्ता॒ । अ॒सि॒ । ध॒र्ता॒ । अ॒सि॒ । सः॑ । अ॒ग्नि॒म् ।
वै॒श्वा॒न॒र॒म् । स॒प्र॒थ॒स॒मि॒ति॑ स – प्र॒थ॒स॒म् । ग॒च्छ॒ । स्वा॒हा॒कृ॒त
इति॑ स्वा॒हा – कृ॒तः॑ । पृ॒थि॒व्या॒म् । य॒न्ता॒ । रा॒ट् । य॒न्ता॒ । अ॒सि॒ ।
य॒म॒नः॑ । ध॒र्ता॒ । अ॒सि॒ । ध॒रु॒णः॑ () । कृ॒ष्यै॑ । त्वा॒ । क्षे॒मा॒य॒ । त्वा॒ ।

र॒य्यै । त्वा । पो॒षाय । त्वा । पृ॒थि॒व्यै । त्वा । अ॒न्तरि॑क्षाय । त्वा ।
दि॒वे । त्वा । स॒ते । त्वा । अ॒सते । त्वा । अ॒द्भ्य इ॒त्यत् – भ्यः ।
त्वा । ओ॒षधी॑भ्य इ॒त्योष॑धि – भ्यः । त्वा । वि॒श्वे॑भ्यः । त्वा ।
भू॒तेभ्यः ॥ 40 (75) (ध॒रुणः – प॒ञ्चवि॑ंशतिश्च) (A11)

TS 7.1.12.1

वि॒भूर्मा॒त्रा प्र॒भूः पि॒त्राश्चो॑ऽसि ह॒योऽस्य॑त्यो॑ऽसि न॒रोऽस्य॑र्वा॑ऽसि
स॒प्तिर॑सि वा॒ज्यसि॑ वृ॒षाऽसि॑ नृ॒मणा॑ अ॒सि य॒युर्ना॑मा॒स्यादि॒त्यानां॑
प॒त्वान्वि॑ह्य॒ग्नये॑ स्वाहा स्वाहे॑न्द्रा॒ग्निभ्या॑ स्वाहा प्र॒जाप॑तये स्वाहा
वि॒श्वे॑भ्यो दे॒वेभ्यः॑ स्वाहा सर्वा॑भ्यो दे॒वेता॑भ्य इ॒ह धृ॑तिः स्वाहे॒ह
वि॒धृतिः॑ स्वाहे॒ह र॑न्तिः स्वाहे () – ह र॑मतिः स्वाहा भू॒रसि॑ भु॒वे त्वा
भ॒व्याय॑ त्वा भ॒विष्य॑ते त्वा वि॒श्वे॑भ्यस्त्वा भू॒तेभ्यो॑ दे॒वा आ॑शा॒पाला॑ ए॒तं
दे॒वेभ्यो॑ऽश्वं मे॒धाय॑ प्रो॒क्षितं॑ गो॒पाय॑त ॥ 41

TS 7.1.12.1 - Padam

वि॒भूरि॑ति वि – भूः । मा॒त्रा । प्र॒भूरि॑ति प्र – भूः । पि॒त्रा । अ॒श्वः ।
अ॒सि । ह॒यः । अ॒सि । अ॒त्यः । अ॒सि । न॒रः । अ॒सि । अ॒र्वा ।

अ॒सि॒ । स॒प्तिः॑ । अ॒सि॒ । वा॒जी । अ॒सि॒ । वृ॒षा॑ । अ॒सि॒ ।
नृ॒मणा॑ इति॑ नृ – म॒नाः॑ । अ॒सि॒ । य॒युः॑ । ना॒म । अ॒सि॒ ।
आ॒दि॒त्याना॑म् । प॒त्व । अ॒न्वि॒ति॑ । इ॒हि॒ । अ॒ग्नये॑ । स्वा॒हा॑ । स्वा॒हा॑ ।
इ॒न्द्रा॒ग्नि॒भ्यामि॒तीन्द्रा॑ग्नि – भ्या॒म् । स्वा॒हा॑ । प्र॒जाप॑तय इति॑
प्र॒जा – प॒तये॑ । स्वा॒हा॑ । वि॒श्वेभ्यः॑ । दे॒वेभ्यः॑ । स्वा॒हा॑ । सर्वा॑भ्यः ।
दे॒वेता॑भ्यः । इ॒ह । धृ॒तिः॑ । स्वा॒हा॑ । इ॒ह । वि॒धृति॑रिति॑ वि – धृ॒तिः॑ ।
स्वा॒हा॑ । इ॒ह । र॒न्तिः॑ । स्वा॒हा॑ () । इ॒ह । र॒मतिः॑ । स्वा॒हा॑ । भूः॑ ।
अ॒सि॒ । भु॒वे । त्वा॒ । भ॒व्याय॑ । त्वा॒ । भ॒विष्य॑ते । त्वा॒ । वि॒श्वेभ्यः॑ ।
त्वा॒ । भू॒तेभ्यः॑ । दे॒वाः॑ । आ॒शापा॑ला इत्या॒शा – पा॒लाः॑ । ए॒तम् ।
दे॒वेभ्यः॑ । अ॒श्वम् । मे॒धाय॑ । प्रो॒क्षित॑मिति॑ प्र – उ॒क्षित॑म् ।

गो॒पाय॑त ॥ 41 (72) (र॒न्तिः॑ स्वा॒हा – द्वावि॑ंशतिश्च] (A12)

TS 7.1.13.1

आ॒यना॑य स्वा॒हा प्रा॒यणा॑य स्वा॒होद्द्रा॑वाय स्वा॒होद्द्रु॑ताय स्वा॒हा
शू॒का॒राय॑ स्वा॒हा शू॒कृता॑य स्वा॒हा प॒लायि॑ताय स्वा॒हा ऽप॒लायि॑ताय

स्वाहा ऽऽवल्गाते स्वाहा परावल्गाते स्वाहा ऽऽयते स्वाहा प्रयते स्वाहा
सर्वस्मै स्वाहा ॥ 42

TS 7.1.13.1 - Padam

आयनायेत्या – अयनाय । स्वाहा । प्रायणायेति प्र – अयनाय ।
स्वाहा । उद्द्रावायेत्युत् – द्रावाय । स्वाहा । उद्द्रुतायेत्युत् – द्रुताय ।
स्वाहा । शूकारायेति शू – काराय । स्वाहा । शूकृतायेति शू – कृताय ।
स्वाहा । पलायिताय । स्वाहा । आपलायितायेत्या – पलायिताय ।
स्वाहा । आवल्गात इत्या – वल्गाते । स्वाहा । परावल्गात इति
परा – वल्गाते । स्वाहा । आयत इत्या – यते । स्वाहा ।
प्रयत इति प्र – यते । स्वाहा । सर्वस्मै । स्वाहा ॥ 42 (26)

(आयनायोत्तरमापलायिताय षड्विंशतिः) (A13)

TS 7.1.14.1

अग्नये स्वाहा सोमाय स्वाहा वायवे स्वाहा ऽपां मोदाय स्वाहा
सवित्रे स्वाहा सरस्वत्यै स्वाहेन्द्राय स्वाहा बृहस्पतये स्वाहा
मित्राय स्वाहा वरुणाय स्वाहा सर्वस्मै स्वाहा ॥ 43

TS 7.1.14.1 - Padam

अ॒ग्नये॑ । स्वा॒हा । सो॒माय॑ । स्वा॒हा । वा॒यवे॑ । स्वा॒हा । अ॒पाम् ।
मो॒दाय॑ । स्वा॒हा । स॒वित्रे॑ । स्वा॒हा । सर॑स्वत्यै । स्वा॒हा । इन्द्रा॑य ।
स्वा॒हा । बृ॒हस्प॑तये । स्वा॒हा । मि॒त्राय॑ । स्वा॒हा । वरु॑णाय । स्वा॒हा ।
सर्व॑स्मै । स्वा॒हा ॥ 43 (23)

(अ॒ग्नये॑ वा॒यवे॑ऽपां मो॒दायेन्द्रा॑य त्रयो॑वि॒ंशतिः॑) (A14)

TS 7.1.15.1

पृ॒थिव्यै॑ स्वा॒हा । अ॒न्तरि॑क्षाय स्वा॒हा । दि॒वे स्वा॒हा । सू॒र्याय॑ स्वा॒हा । च॒न्द्रम॑से
स्वा॒हा । नक्ष॑त्रेभ्यः स्वा॒हा । प्रा॒च्यै दि॒शे स्वा॒हा । दक्षि॑णायै दि॒शे स्वा॒हा ।
प्र॒तीच्यै॑ दि॒शे स्वा॒हो-दी॒च्यै दि॒शे स्वा॒होर्ध्वा॑यै दि॒शे स्वा॒हा । दिग्भ्यः॑
स्वा॒हा । अ॒न्तरदि॑शाभ्यः स्वा॒हा । स॒माभ्यः॑ स्वा॒हा । शर॑द्भ्यः स्वा॒हा ।
अ॒होरा॑त्रेभ्यः स्वा॒हा । अ॒र्धमा॑सेभ्यः स्वा॒हा । मा॒सेभ्यः॑ स्वा॒हा । तु॒र्भ्यः॑
स्वा॒हा । सँव॑त्सराय स्वा॒हा । सर्व॑स्मै स्वा॒हा ॥ 44

TS 7.1.15.1 - Padam

पृ॒थिव्यै॑ । स्वा॒हा । अ॒न्तरि॑क्षाय । स्वा॒हा । दि॒वे । स्वा॒हा । सू॒र्याय॑ ।
स्वा॒हा । च॒न्द्रम॑से । स्वा॒हा । नक्ष॑त्रेभ्यः । स्वा॒हा । प्रा॒च्यै । दि॒शे ।

स्वाहा॑ । दक्षि॑णायै॑ । दि॒शे । स्वाहा॑ । प्र॒ती॒च्यै॑ । दि॒शे । स्वाहा॑ ।
उ॒दी॒च्यै॑ । दि॒शे । स्वाहा॑ । ऊ॒र्ध्वा॒यै॑ । दि॒शे । स्वाहा॑ । दि॒ग्भ्य॑ इति॑
दिक् – भ्यः॑ । स्वाहा॑ । अ॒वा॒न्त॒र॒दि॒शा॒भ्य॑ इत्य॑वा॒न्त॒र – दि॒शा॒भ्यः॑ ।
स्वाहा॑ । स॒मा॒भ्यः॑ । स्वाहा॑ । श॒र॒द्भ्य॑ इति॑ श॒र॒त् – भ्यः॑ । स्वाहा॑ ।
अ॒हो॒रा॒त्रे॒भ्य॑ इत्य॑हः – रा॒त्रे॒भ्यः॑ । स्वाहा॑ ।
अ॒र्ध॒मा॒से॒भ्य॑ इत्य॑र्ध॒मा॒से॒भ्यः॑ । स्वाहा॑ । मा॒से॒भ्यः॑ । स्वाहा॑ ।
ऋ॒तु॒भ्य॑ इत्य॑तु – भ्यः॑ । स्वाहा॑ । सँ॒व॒त्स॒रा॒येति॑ सं – व॒त्स॒रा॒य॑ ।
स्वाहा॑ । स॒र्व॒स्मै॑ । स्वाहा॑ ॥ 44 (47) (पृ॒थि॒व्यै॑ सू॒र्या॒य॑ नक्ष॑त्रे॒भ्यः॑

प्रा॒च्यै॑ स॒प्त॒च॒त्वा॒रि॒ंश॒त्) (A15)

TS 7.1.16.1

अ॒ग्न॒ये॒ स्वाहा॑ सो॒मा॒य॑ स्वाहा॑ स॒वि॒त्रे॒ स्वाहा॑ स॒र॒स्व॒त्यै॑ स्वाहा॑
पू॒ष्णे॒ स्वाहा॑ बृ॒ह॒स्प॒त॒ये॒ स्वाहा॑ ऽपां॑ मो॒दा॒य॑ स्वाहा॑ वा॒य॒वे॒ स्वाहा॑
मि॒त्रा॒य॑ स्वाहा॑ व॒रु॒णा॒य॑ स्वाहा॑ स॒र्व॒स्मै॑ स्वाहा॑ ॥ 45

TS 7.1.16.1 - Padam

अ॒ग्नये॑ । स्वा॒हा । सो॒माय॑ । स्वा॒हा । स॒वि॒त्रे । स्वा॒हा । स॒र॒स्व॒त्यै ।
स्वा॒हा । पू॒ष्णे । स्वा॒हा । बृ॒ह॒स्प॒तये॑ । स्वा॒हा । अ॒पाम् । मो॒दाय॑ ।
स्वा॒हा । वा॒यवे॑ । स्वा॒हा । मि॒त्राय॑ । स्वा॒हा । व॒रु॒णाय॑ । स्वा॒हा ।
स॒र्व॒स्मै । स्वा॒हा ॥ 45 (23)

(अ॒ग्नये॑ स॒वि॒त्रे पू॒ष्णेऽपां॑ मो॒दाय॑ वा॒यवे॑ त्रयो॑वि॒ंश॒तिः) (A16)

TS 7.1.17.1

पृ॒थि॒व्यै स्वा॒हा । अ॒न्त॒रि॒क्षाय॑ स्वा॒हा । दि॒वे स्वा॒हा । अ॒ग्नये॑ स्वा॒हा ।
सो॒माय॑ स्वा॒हा । सू॒र्याय॑ स्वा॒हा । च॒न्द्र॒म॒से स्वा॒हा । ऽ॒हे स्वा॒हा ।
रा॒त्रि॒यै स्वा॒ह॒र्ज॒वे स्वा॒हा । सा॒ध॒वे स्वा॒हा । सु॒क्षि॒त्यै स्वा॒हा । क्षु॒धे स्वा॒हा ।
ऽऽ॒शि॒ति॒म्ने स्वा॒हा । रो॒गाय॑ स्वा॒हा । हि॒माय॑ स्वा॒हा । शी॒ताय॑ स्वा॒हा ।
ऽऽ॒त॒पाय॑ स्वा॒हा । ऽ॒र॒ण्याय॑ स्वा॒हा । सु॒व॒र्गाय॑ स्वा॒हा । लो॒काय॑ स्वा॒हा ।
स॒र्व॒स्मै स्वा॒हा ॥ 46

TS 7.1.17.1 - Padam

पृ॒थि॒व्यै । स्वा॒हा । अ॒न्त॒रि॒क्षाय॑ । स्वा॒हा । दि॒वे । स्वा॒हा । अ॒ग्नये॑ ।
स्वा॒हा । सो॒माय॑ । स्वा॒हा । सू॒र्याय॑ । स्वा॒हा । च॒न्द्र॒म॒से । स्वा॒हा ।

अ॒ह॑ ॥ स्वा॒हा । रा॒त्रि॒यै । स्वा॒हा । ऋ॒ज॒वे । स्वा॒हा । सा॒ध॒वे ।
 स्वा॒हा । सु॒क्षि॒त्या इति॑ सु – क्षि॒त्यै । स्वा॒हा । क्षु॒धे । स्वा॒हा ।
 आ॒शि॒ति॒म्ने । स्वा॒हा । रो॒गा॒य । स्वा॒हा । हि॒मा॒य । स्वा॒हा । शी॒ता॒य ।
 स्वा॒हा । आ॒त॒पा॒ये॒त्या – त॒पा॒य । स्वा॒हा । अ॒र॒ण॒या॒य । स्वा॒हा ।
 सु॒व॒र्गा॒ये॒ति सु॒वः – गा॒य । स्वा॒हा । लो॒का॒य । स्वा॒हा । स॒र्व॒स्मै ।
 स्वा॒हा ॥ 46 (44) (पृ॒थि॒व्या अ॒ग्नये॑ऽह॑ र॒त्रि॒यै चतु॑श्चत्वारि॒ंश॑त्)

(A17)

TS 7.1.18.1

भु॒वो दे॒वानां॑ क॒र्म॒णाऽप॒स॒र्त॒स्य प॒थ्याऽसि॑ व॒सु॒भि-दे॒वे॒भि-दे॒व॒तया॑
 गा॒य॒त्रेण॑ त्वा छ॒न्द॒सा यु॒न॒ज्मि व॒स॒न्तेन॑ त्व॒र्तु॒ना ह॒विषा॑ दी॒क्षया॑मि
 रु॒द्रे॒भि-दे॒वे॒भि-दे॒व॒तया॑ त्रै॒ष्टु॒भेन॑ त्वा छ॒न्द॒सा यु॒न॒ज्मि ग्री॒ष्मेण॑
 त्व॒र्तु॒ना ह॒विषा॑ दी॒क्षया॑-म्यादि॒त्ये॒भि-दे॒वे॒भि-दे॒व॒तया॑ जा॒ग॒तेन॑ त्वा
 छ॒न्द॒सा यु॒न॒ज्मि व॒र॒षाभि॑स्त्व॒र्तु॒ना ह॒विषा॑ दी॒क्षया॑मि वि॒श्वे॒भि-
 दे॒वे॒भि-दे॒व॒तया॑ ऽऽनु॒ष्टु॒भेन॑ त्वा छ॒न्द॒सा यु॒न॒ज्मि – [] 47

TS 7.1.18.1 - Padam

भुवः॑ । दे॒वाना॑म् । क॒र्मणा॑ । अ॒पसा॑ । ऋ॒तस्य॑ । प॒थ्या॑ । अ॒सि ।
व॒सुभि॑रिति॒ वसु॑ – भिः॑ । दे॒वेभिः॑ । दे॒वतया॑ । गा॒यत्रे॑ण । त्वा ।
छ॒न्दसा॑ । यु॒नज्मि॑ । व॒सन्ते॑न । त्वा । ऋ॒तुना॑ । ह॒विषा॑ । दी॒क्षया॑मि ।
रु॒द्रेभिः॑ । दे॒वेभिः॑ । दे॒वतया॑ । त्रै॒ष्टुभे॑न । त्वा । छ॒न्दसा॑ । यु॒नज्मि॑ ।
ग्री॒ष्मेण॑ । त्वा । ऋ॒तुना॑ । ह॒विषा॑ । दी॒क्षया॑मि । आ॒दित्ये॑भिः ।
दे॒वेभिः॑ । दे॒वतया॑ । जा॒गते॑न । त्वा । छ॒न्दसा॑ । यु॒नज्मि॑ । व॒र्षाभिः॑ ।
त्वा । ऋ॒तुना॑ । ह॒विषा॑ । दी॒क्षया॑मि । वि॒श्वेभिः॑ । दे॒वेभिः॑ । दे॒वतया॑ ।
आ॒नुष्टु॑भेनेत्यानु – स्तु॒भेन॑ । त्वा । छ॒न्दसा॑ । यु॒नज्मि॑ । 47 (50)

TS 7.1.18.2

श॒रदा॑ त्व॒र्तुना॑ ह॒विषा॑ दी॒क्षया॑म्यङ्गि॒रोभि॑-दे॒वेभि॑-दे॒वतया॑
पा॒ङ्गेन॑ त्वा छ॒न्दसा॑ यु॒नज्मि॑ हे॒मन्त॑शि॒शिरा॑भ्यां त्व॒र्तुना॑ ह॒विषा॑
दी॒क्षया॑म्याऽहं दी॒क्षाम॑रु॒हमृ॑तस्य प॒त्नीं गा॒यत्रे॑ण छ॒न्दसा॑
ब्र॒ह्मणा॑ च॒र्त॑त् स॒त्येऽधा॑त् स॒त्यमृ॑तेऽधां ॥

म॒ही मू॒ षु सु॒त्रामा॑ण – मि॒ह धृ॒तिः स्वा॒हेह वि॒धृतिः॑ स्वा॒हेह रन्तिः॑
स्वा॒हेह र॒मतिः॑ स्वा॒हा ॥ 48

TS 7.1.18.2 - Padam

श॒रदा॑ । त्वा । ऋ॒तुना॑ । ह॒विषा॑ । दी॒क्षया॑मि ।
अ॒ङ्गिरो॑भि॒रित्य॑ङ्गि॒रः– भिः । दे॒वेभिः॑ । दे॒वत॑या । पा॒ङ्केन॑ । त्वा ।
छ॒न्दसा॑ । यु॒नज्मि॑ । हे॒मन्त॑शि॒शिरा॑भ्यामि॒ति हे॒मन्त॑ – शि॒शिरा॑भ्याम् ।
त्वा । ऋ॒तुना॑ । ह॒विषा॑ । दी॒क्षया॑मि । ए॒ति । अ॒हम् । दी॒क्षाम् ।
अ॒रुह॑म् । ऋ॒तस्य॑ । प॒त्नीम् । गा॒यत्रे॑ण । छ॒न्दसा॑ । ब्र॒ह्मणा॑ । च ।
ऋ॒तम् । स॒त्ये । अ॒धाम् । स॒त्यम् । ऋ॒ते । अ॒धाम् ॥ म॒हीम् । उ ।
स्वि॒ति । सु॒त्रामा॑णमि॒ति सु – त्रा॑मा॒णम् । इ॒ह । धृ॒तिः । स्वा॒हा ।
इ॒ह । वि॒धृति॑रि॒ति वि – धृ॒तिः । स्वा॒हा । इ॒ह । रन्तिः॑ । स्वा॒हा ।
इ॒ह । र॒मतिः॑ । स्वा॒हा ॥ 48 (49)

(आ॒नुष्टु॑भेन त्वा छ॒न्दसा॑ यु॒नज्म्ये॑ – का॒त्र प॒ञ्चा॒शच्च॑) (A18)

TS 7.1.19.1

ई॒का॒रा॒य॒ स्वा॒हे॑ कृ॒ता॒य॒ स्वा॒हा॒ क्र॒न्द॒ते॒ स्वा॒हा॒ ऽव॒क्र॒न्द॒ते॒ स्वा॒हा॒
प्रो॒थ॒ते॒ स्वा॒हा॒ प्र॒प्रो॒थ॒ते॒ स्वा॒हा॒ ग॒न्धा॒य॒ स्वा॒हा॒ घ्रा॒ता॒य॒ स्वा॒हा॒
प्रा॒णा॒य॒ स्वा॒हा॒ व्या॒ना॒य॒ स्वा॒हा॒ ऽपा॒ना॒य॒ स्वा॒हा॒ स॒न्दी॒य॒मा॒ना॒य॒ स्वा॒हा॒
स॒न्दि॒ता॒य॒ स्वा॒हा॒ वि॒चृ॒त्य॒मा॒ना॒य॒ स्वा॒हा॒ वि॒चृ॒त्ता॒य॒ स्वा॒हा॒
प॒ला॒यि॒ष्य॒मा॒णा॒य॒ स्वा॒हा॒ प॒ला॒यि॒ता॒य॒ स्वा॒हो॒पर॒॑स्य॒ते॒ स्वा॒हो॒पर॑ता॒य॒
स्वा॒हा॒ नि॒वे॒क्ष्य॒ते॒ स्वा॒हा॒ नि॒वि॒श॒मा॒ना॒य॒ स्वा॒हा॒ नि॒वि॒ष्टा॒य॒ स्वा॒हा॒
नि॒ष॒थ॒स्य॒ते॒ स्वा॒हा॒ नि॒षी॒द॒ते॒ स्वा॒हा॒ नि॒ष॒ण्णा॒य॒ स्वा॒हा॒ – [] 49

TS 7.1.19.1 - Padam

ई॒का॒रा॒ये॒ती॒म् – का॒रा॒य॒ । स्वा॒हा॒ । ई॒कृ॒ता॒ये॒ती॒म् – कृ॒ता॒य॒ । स्वा॒हा॒ ।
क्र॒न्द॒ते॒ । स्वा॒हा॒ । अ॒व॒क्र॒न्द॒त॒ इत्य॑व – क्र॒न्द॒ते॒ । स्वा॒हा॒ । प्रो॒थ॒ते॒ ।
स्वा॒हा॒ । प्र॒प्रो॒थ॒त॒ इति॑ प्र – प्रो॒थ॒ते॒ । स्वा॒हा॒ । ग॒न्धा॒य॒ । स्वा॒हा॒ ।
घ्रा॒ता॒य॒ । स्वा॒हा॒ । प्रा॒णा॒ये॒ति॒ प्र – अ॒ना॒य॒ । स्वा॒हा॒ । व्या॒ना॒ये॒ति॒
वि – अ॒ना॒य॒ । स्वा॒हा॒ । अ॒पा॒ना॒ये॒त्य॒प – अ॒ना॒य॒ । स्वा॒हा॒ ।
सं॒दी॒य॒मा॒ना॒ये॒ति॒ सं–दी॒य॒मा॒ना॒य॒ । स्वा॒हा॒ । सं॒दि॒ता॒ये॒ति॒ सं–दि॒ता॒य॒ ।

स्वाहा॥ वि॒चृत्य॑मा॒नाये॑ति वि – चृत्य॑मा॒नाय॑ । स्वाहा॥ वि॒चृ॒त्ताये॑ति
वि – चृ॒त्ताय॑ । स्वाहा॥ प॒लायि॑ष्यमा॒णाय॑ । स्वाहा॥ प॒लायि॑ताय॑ ।
स्वाहा॥ उ॒पर॑स्य॒त इत्यु॑प – र॒स्यते॑ । स्वाहा॥
उ॒पर॑तायेत्यु॑प – र॒ताय॑ । स्वाहा॥ नि॒वेक्ष्य॑त इति॑ नि – वे॒क्ष्यते॑ ।
स्वाहा॥ नि॒वि॒शमा॑नायेति॑ नि – वि॒शमा॑नाय॑ । स्वाहा॥ नि॒वि॒ष्टाये॑ति
नि – वि॒ष्टाय॑ । स्वाहा॥ नि॒ष॒थ्स्य॑त इति॑ नि – स॒थ्स्य॑ते । स्वाहा॥
नि॒षीद॑त इति॑ नि – सी॒दते॑ । स्वाहा॥ नि॒षण्णा॑येति॑ नि – स॒न्नाय॑ ।
स्वाहा॥ 49 (50)

TS 7.1.19.2

ऽऽसि॑ष्यते स्वाहा ऽऽसी॑नाय॒ स्वाहा ऽऽसि॑ताय॒ स्वाहा नि॒प॒थ्स्य॑ते
स्वाहा नि॒प॒द्य॑मा॒नाय॑ स्वाहा नि॒प॒न्नाय॑ स्वाहा श॒यि॑ष्यते स्वाहा
श॒या॒नाय॑ स्वाहा श॒यि॑ताय॒ स्वाहा सं॒मी॒लि॑ष्यते स्वाहा सं॒मी॒ल॑ते
स्वाहा सं॒मी॒लि॑ताय॒ स्वाहा स्व॒प्स्य॑ते स्वाहा स्व॒प॑ते स्वाहा सु॒प्ताय॑
स्वाहा प्र॒भो॒थ्स्य॑ते स्वाहा प्र॒बु॒द्ध्य॑मा॒नाय॑ स्वाहा प्र॒बु॒द्ध्या॑ स्वाहा

जा॒गरि॒ष्य॒ते॒ स्वा॒हा जा॒ग्र॒ते॒ स्वा॒हा जा॒गरि॒ताय॒ स्वा॒हा शु॒श्रू॒ष॒मा॒णाय॒
स्वा॒हा शृ॒ण्व॒ते॒ स्वा॒हा श्रु॒ताय॒ स्वा॒हा वी॒क्षि॒ष्य॒ते॒ स्वा॒हा – [] 50

TS 7.1.19.2 - Padam

आ॒सि॒ष्य॒ते॒ । स्वा॒हा । आ॒सी॒नाय॒ । स्वा॒हा । आ॒सि॒ताय॒ । स्वा॒हा ।
नि॒प॒थ्स्य॒त इति॑ नि – प॒थ्स्य॒ते॒ । स्वा॒हा । नि॒प॒द्य॒मा॒नायेति॑
नि – प॒द्य॒मा॒नाय॒ । स्वा॒हा । नि॒प॒न्नायेति॑ नि – प॒न्नाय॒ । स्वा॒हा ।
श॒यि॒ष्य॒ते॒ । स्वा॒हा । श॒या॒नाय॒ । स्वा॒हा । श॒यि॒ताय॒ । स्वा॒हा ।
स॒म्मी॒लि॒ष्य॒त इति॑ सं – मी॒लि॒ष्य॒ते॒ । स्वा॒हा । स॒म्मी॒ल॒त इति॑
सं – मी॒ल॒ते॒ । स्वा॒हा । स॒म्मी॒लि॒तायेति॑ सं – मी॒लि॒ताय॒ ।
स्वा॒हा । स्व॒प्स्य॒ते॒ । स्वा॒हा । स्व॒प॒ते॒ । स्वा॒हा । सु॒प्ताय॒ । स्वा॒हा ।
प्र॒भो॒त्स्य॒त इति॑ प्र – भो॒त्स्य॒ते॒ । स्वा॒हा । प्र॒बु॒द्ध्य॒मा॒नायेति॑
प्र – बु॒द्ध्य॒मा॒नाय॒ । स्वा॒हा । प्र॒बु॒द्धायेति॑ प्र – बु॒द्धाय॒ । स्वा॒हा ।
जा॒गरि॒ष्य॒ते॒ । स्वा॒हा । जा॒ग्र॒ते॒ । स्वा॒हा । जा॒गरि॒ताय॒ । स्वा॒हा ।
शु॒श्रू॒ष॒मा॒णाय॒ । स्वा॒हा । शृ॒ण्व॒ते॒ । स्वा॒हा । श्रु॒ताय॒ । स्वा॒हा ।
वी॒क्षि॒ष्य॒त इति॑ वि – ई॒क्षि॒ष्य॒ते॒ । स्वा॒हा । 50 (50)

TS 7.1.19.3

वी॒क्ष॒मा॒णाय॑ स्वा॒हा वी॒क्षि॒ताय॑ स्वा॒हा स॒हा॒स्य॑ते स्वा॒हा सं॒जि॒हा॒नाय॑
स्वा॒हो-जि॒हा॒नाय॑ स्वा॒हा वि॒व॒थ्स्य॑ते स्वा॒हा वि॒व॒र्त॒मा॒नाय॑ स्वा॒हा
वि॒वृ॒त्ताय॑ स्वा॒हो-त्था॑स्य॒ते स्वा॒होत्ति॑ष्ठ॒ते स्वा॒होत्थि॑ताय॒ स्वाहा
वि॒ध॒वि॒ष्य॑ते स्वा॒हा वि॒धू॒न्वा॒नाय॑ स्वा॒हा वि॒धू॒ताय॑ स्वा॒हो-त्क्र॑स्य॒ते
स्वा॒होत्क्रा॑म॒ते स्वा॒होत्क्रा॑न्ताय॒ स्वाहा च॒ङ्क्र॑मिष्य॒ते स्वाहा
च॒ङ्क्र॑म्यमा॒णाय॑ स्वा॒हा च॒ङ्क्र॑मि॒ताय॑ स्वा॒हा कण्डू॑यिष्य॒ते स्वाहा
कण्डू॑यमा॒नाय॑ स्वा॒हा कण्डू॑यि॒ताय॑ स्वा॒हा नि॒क॒षि॒ष्य॑ते स्वा॒हा
नि॒क॒ष॒मा॒णाय॑ स्वा॒हा () नि॒क॒षि॒ताय॑ स्वा॒हा यद॑त्ति तस्मै॒ स्वाहा यत्
पि॒ब॑ति तस्मै॒ स्वाहा यन्मे॑हति तस्मै॒ स्वाहा यच्छ॑कृत् करोति तस्मै॒
स्वा॒हा रे॒त॒से स्वा॒हा प्र॒जा॒भ्यः स्वा॒हा प्र॒ज॒न॒नाय॑ स्वा॒हा सर्व॑स्मै॒
॥
स्वा॒हा ॥ 51

TS 7.1.19.3 - Padam

वी॒क्ष॒मा॒णाये॑ति वि-ई॒क्ष॒मा॒णाय॑ । स्वा॒हा । वी॒क्षि॒ताये॑ति वि-ई॒क्षि॒ताय॑ ।
स्वा॒हा । स॒हा॒स्य॑त इति सं - हा॒स्य॑ते । स्वा॒हा ।

संजि॑हाना॒येति॑ सं – जि॒हाना॑य । स्वाहा॑ ॥ उज्जि॑हाना॒येत्युत्-
जि॒हाना॑य । स्वाहा॑ ॥ वि॒वथ्स्य॑त इति॑ वि – वथ्स्य॑ते । स्वाहा॑ ॥
वि॒वर्त॑माना॒येति॑ वि – वर्त॑मानाय । स्वाहा॑ ॥ वि॒वृत्ता॑येति॑ वि-वृत्ता॑य ।
स्वाहा॑ ॥ उत्था॑स्यत इत्युत् – स्था॑स्यते । स्वाहा॑ ॥ उत्तिष्ठ॑त इत्युत्-
तिष्ठ॑ते । स्वाहा॑ ॥ उत्थि॑तायेत्युत् – स्थि॑ताय । स्वाहा॑ ॥
वि॒धवि॑ष्यत इति॑ वि – धवि॑ष्यते । स्वाहा॑ ॥
वि॒धून्वा॑ना॒येति॑ वि – धून्वा॑नाय । स्वाहा॑ ॥ वि॒धूता॑येति॑ वि – धू॒ताय॑ ।
स्वाहा॑ ॥ उत्क्र॑स्यत इत्युत् – क्र॑स्यते । स्वाहा॑ ॥
उत्क्रा॑मत इत्युत् – क्रा॑मते । स्वाहा॑ ॥
उत्क्रा॑न्तायेत्युत् – क्रा॑न्ताय । स्वाहा॑ ॥ चङ्क्र॑मिष्यते । स्वाहा॑ ॥
चङ्क्र॑म्यमा॒णाय॑ । स्वाहा॑ ॥ चङ्क्र॑मिता॒य । स्वाहा॑ ॥ कण्डू॑यिष्यते ।
स्वाहा॑ ॥ कण्डू॑यमा॒णाय॑ । स्वाहा॑ ॥ कण्डू॑यिता॒य । स्वाहा॑ ॥
नि॒कषि॑ष्यत इति॑ नि – कषि॑ष्यते । स्वाहा॑ ॥ नि॒कष॑माणा॒येति॑
नि – कष॑मा॒णाय॑ । स्वाहा॑ () । नि॒कषि॑ता॒येति॑ नि – कषि॑ताय ।

स्वाहा॑ । यत् । अ॒त्ति॑ । तस्मै॑ ॥ स्वाहा॑ । यत् । पि॒ब॒ति॑ । तस्मै॑ ।
स्वाहा॑ । यत् । मे॒ह॒ति॑ । तस्मै॑ ॥ स्वाहा॑ । यत् । श॒कृ॒त् । क॒रो॒ति॑ ।
तस्मै॑ ॥ स्वाहा॑ । रे॒त॒से॑ । स्वाहा॑ । प्र॒जा॒भ्य॒ इति॑ प्र – जा॒भ्यः॑ ।
स्वाहा॑ । प्र॒ज॒न॒ना॒ये॒ति॑ प्र – ज॒न॒ना॒य॑ । स्वाहा॑ । स॒र्व॒स्मै॑ ।
स्वाहा॑ ॥ 51 (77) (नि॒ष॒ण्णाय॑ स्वाहा॑ – वी॒क्षि॒ष्य॒ते स्वाहा॑ –

नि॒क॒ष॒मा॒णाय॑ स्वाहा॑ – स॒प्त॒वि॒ंश॒तिश्च॑) (A19)

TS 7.1.20.1

अ॒ग्नये॑ स्वाहा॑ वा॒यवे॑ स्वाहा॑ सू॒र्याय॑ स्वाहा॑-र्त॒म॒स्यृ॒त॒स्य॒र्त॒म॒सि॑
स॒त्य॒म॒सि॑ स॒त्य॒स्य॑ स॒त्य॒म॒स्यृ॒त॒स्य॑ प॒न्था॑ अ॒सि॑ दे॒वानां॑ छा॒याऽमृ॒त॒स्य॑
ना॒म तथ् स॒त्यं यत् त्वं प्र॒जा॒प॒ति॒र॒स्य॒धि यद॑स्मिन् वा॒जिनी॑व शु॒भः
स्प॒र्ध्व॒न्ते दि॒वः सू॒र्येण॑ वि॒शोऽपो॑ वृ॒णानः॑ प॒वते॑ क॒व्यन् प॒शुं न गो॒पा
इ॒र्यः॑ परि॒ज्मा ॥ 52

TS 7.1.20.1 - Padam

अ॒ग्नये॑ । स्वाहा॑ । वा॒यवे॑ । स्वाहा॑ । सू॒र्याय॑ । स्वाहा॑ । ऋ॒तम् ।
अ॒सि॑ । ऋ॒त॒स्य॑ । ऋ॒तम् । अ॒सि॑ । स॒त्यम् । अ॒सि॑ । स॒त्य॒स्य॑ ।

स॒त्यम् । अ॒सि॒ । ऋ॒तस्य॑ । प॒न्थाः॑ । अ॒सि॒ । दे॒वाना॑म् । छा॒या ।
अ॒मृत॑स्य । ना॒म । तत् । स॒त्यम् । यत् । त्वम् । प्र॒जाप॑तिरिति
प्र॒जा – प॒तिः । अ॒सि॒ । अधी॑ति । यत् । अ॒स्मिन् । वा॒जिनि॑ । इ॒व ।
शु॒भः । स्प॒र्द्धन्ते॑ । दि॒वः । सू॒र्येण॑ । वि॒शः । अ॒पः । वृ॒णानः॑ ।
प॒वते॑ । क॒व्यन् । प॒शुम् । न । गो॒पा इति॑ गो – पाः । इ॒र्यः ।
परि॒ज्मेति॑ परि – ज्मा ॥ 52 (48)

(अ॒ग्नये॑ वा॒यवे॑ सू॒र्याया॑ – ऽष्टा॑च॒त्वारि॑ंशत्) (A20)

Prasna Korvai with starting Padams of 1 to 20 Anuvaakams :-

(प्र॒जन॑नं – प्रा॒तस्स॑वने वै – ब्र॒ह्मवा॑दि॒नः स॒ त्वा – अ॒ङ्गिर॑स – आ॒पो
वै – सो॒मो वै – स॒हस्र॑त॒म्या – त्रि – र्ज॒मद॑ग्निः – सँ॒वत्स॑रो –
दे॒वस्य॑ – वि॒भू – रा॒यना॑या – ऽग्नये॑ – पृ॒थि॒व्या – अ॒ग्नये॑ – पृ॒थि॒व्यै
– भु॒व – ई॒का॒राया॑ – ग्नये॑ वा॒यवे॑ सू॒र्याय॑ – वि॒ंश॑तिः)

Korvai with starting Padams of 1, 11, 21 Series of Panchaatis :-

(प्र॒जन॑न – म॒ङ्गिर॑सः – सो॒मो वै – प्र॒तिगृ॑ह्णाति – वि॒भू –
वी॒क्ष॑मा॒णाय॑ – द्वि॒पञ्चा॑शत्)

पद पाठे (वाक्य सहित) – सप्तमकाण्डे – प्रथमः प्रश्नः

First and Last Padam of First Prasnam of 7th Kandam

(प्र॒जन॑नं – परि॒ज्मा॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

सप्तमकाण्डे प्रथमः प्रश्नः समाप्तः ॥

पद पाठे (वाक्य सहित) – सप्तमकाण्डे – प्रथमः प्रश्नः

Details of Panchati and Padam for Kandam 7, Prasanam 1 (TS 7.1)

	Panchati	Padams
Anuvakam 1	6	309
Anuvakam 2	1	63
Anuvakam 3	3	144
Anuvakam 4	3	171
Anuvakam 5	7	347
Anuvakam 6	8	389
Anuvakam 7	4	212
Anuvakam 8	2	118
Anuvakam 9	1	48
Anuvakam 10	4	200
Anuvakam 11	1	75
Anuvakam 12	1	72
Anuvakam 13	1	26
Anuvakam 14	1	23
Anuvakam 15	1	47
Anuvakam 16	1	23
Anuvakam 17	1	44
Anuvakam 18	2	99
Anuvakam 19	3	177

पद पाठे (वाक्य सहित) – सप्तमकाण्डे – प्रथमः प्रश्नः

Anuvakam 20	1	48
Total →	52	2635

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in